


# KIDIMBU YA KIELEKA YA PAKI

 Lukutakanu ya kubasika ya nsangu ya mbote, kisika Mpangi Neville kuzonzaka na beto nsangu mosi ya kulutila mbote na—na lukutakanu ya Paki.

<sup>2</sup> Mpe ntangu yayi mu zaba ti ya kele mpasi na kuvwanda ya kutelama, lenda ya beto—ya beto ya bisika awa kele fyoti mingi. Mpe ba yufulaka munu kaka kana ba lendaka zibula mukongo awa mpe kutula bantu na kimvuka ya ba-baptiste. Mu tubaka, “Yina kele kisika ya mbote samu na bawu.” Yina vwandaka kisika ya mbote mingi samu na bawu. Bawu, na yawu bawu ke benda ba-rido ya nela na baminuti fyoti, mpe kuzwa, mu banza ti bawu ke telama kaka pene-pene ya poto. Mu zaba ve kana ya kele mutindu yina, to ve, mu ke mona ti ya kele ya kufuluka na maza, na yina bawu fwana telema kaka na zulu ya dibaya. Kasi mu ke mona ti ba ke na kukubika mwa ndambu ya yawu ntangu yayi, na yina ba ke zibula yawu kaka na mwa minuti fioti.

<sup>3</sup> Ntangu yayi, Paki kele kilumbu ya nene samu na beto nionso, beto ke zolaka kaka Paki na mavimpi ya mbote! Mpe ntangu yayi beto ke meka ve na kubumba beno ntangu ya yinda, samu ti na yisi ya bankadulu.

<sup>4</sup> Kasi mu ke zola kaka kusala nsamununu to zole, mpe ya kele ti balukutakanu ya beto—ya beto ke banda Lumingu ke kwisa, ntangu yayi, samu na beno bantu yina me katuka na ngaanda ya mbanza. Ba ke banda na Bloomington, na Illinois, na lupangu ya College ya ba-Methodiste kuna. Mpe bawu ke luta, Lumingu na Lumingu. Mpe na manima ya ke vwanda na madia ya suka ya balongi. Mpe na manima mu fwana kutuba na kimvuka ya balongoki, na college, na suka mosi, mpe ya ke vwanda na madia ya suka kuna, mu me bakula.

<sup>5</sup> Mpe na manima na kulandilaka sabala, na manima, ya kele na kilumbu ya makumi zole na tatu na Lumingu me luta. To yinki ya kele? [Mpangi Neville me tuba, “Ya kele na kima na zulu ya yawu, kaka kuna, mpangi-bakala.”—Mu.] Oh, yinga. Mbote, ba me kabula yawu yimeni, ba zaba yawu. [“Mu zabisaka yawu.”] Yinga, tata, ya kele mbote, mbote. Chicago, ntangu yayi ya vwandaka. . . na yina mu me bakula kubanda mazono na nkokila, ba lenda kwisa ve na Lane Tech Auditorium, na yina ya ke vwanda kivinga mosi pene ya minuti kumi na ditoma katuka na Lane Tech. Ya ke vwanda na kivinga yankaka, mutindu mu me bakula. Na yina, ya ke vwanda kaka na mwa bidimbu yina ba ke talisa beno kuna na . . . kisika lukutakanu ke vwanda.

Na manima beto ke mata, Colombie Britanique. Mpe na manima ya yawu, na Ngonda ya sambwadi na mbala ya ntete, na kilumbu ya yiya, na Miami.

<sup>6</sup> Na yina ya ke kukiyufula samu na lukutakanu ya nene ya tenta, ti kana ya ke kwisa, Mu zola kieleka kuvwanda kuna na . . . beno nyonso yina lenda, na Washington, DC, na mbanza ya nene, samu na lukutakanu. Vwanda lukutakanu ya munu ya ntete ya tenta, beno zaba, kisika Mfumu silaka munu ti Yandi ke kutana na munu na mwa kisika yina na lukutakanu. Mpe ti bawu ke na dikani na yawu ntangu yayi, bawu bokilaka beto mpe tubaka na beto, bantu ya mumbongo kuna, ti bawu lendaka kwisa na Convention Hall, kisika beto tubaka, to beto tulaka tenta mosi ya nene. Mpe kaka na ntangu yandi tubaka “tenta ya nene,” kima mosi ya mutindu ya kusadila, mu banza ti ya kele kisika ya kukutana ke vwanda, na yinzo ya capitole. Na yawu ya kele kieleka, kieleka mbote. Na yina beto ke mona yawu, mpe na manima beno ke zaba mwa ntangu fyoti na ntuala, mutindu Mpeve-Santu ke twadisa nzila yina.

<sup>7</sup> Ntangu yayi mu ke kwikila ti ba kele na mwa ba-bébé awa, yina me katuka na mbanza, ti bawu zolaka pesa na Mfumu. Ntangu yayi, yayi, bantu mingi ke mwangisaka bawu maza, mpe nyonso yina. Mpe ya kele kieleka nyonso ya kulunga, mu ke telemina yawu ve. Na yina, mwa kumwangisa ya maza kele ve Masonuku, samu na bébé to kuluntu, beno me mona. Kumwangisa masa kele kaka mutindu mosi ya dibuundu yina ba ndimaka, ntete na dibuundu ya Katolika, na manima pesaka yawu na Protestantisme. Kasi ya kele ve na Masonuku samu kumwangisa ve masa na bambuta to ba-bébé. Mpe na yina beto ke zolaka kubikana kaka na Masonuku, kaka pene-pene mutindu beto lenda, na kati ya Biblia ba nataka bana ya fyoti na Mfumu ya beto, mpe Yandi zangulaka bawu, bakaka bawu na maboko ya Yandi mpe sakumunaka bawu, mpe tubaka, “Beni bika bana ya fyoti kukwiza na Munu.” Ntangu yayi ya kele yina beto ke na kumeka na kusala, kulanda Misiku ya Mfumu na mutindu yina. Mpe beto ke nata bakuluntu ya dibuundu, mpe beto ke telama mpe ke pesa bana na Mfumu.

<sup>8</sup> Kana pianiste ya beto ke bula nkunga ya beto, *Beno Nata Bawu Na Kati*. Mbote mingi. Mpe bamama yango yina kele na bana ya fyoti, ke kwiza, ke telama na ntuala. Mpangi Neville mpe bayankaka ya bakuluntu ke telama na munu awa, kana bawu zola, mpe beto ke sakumuna bana yayi na Mfumu.

Beno nata bawu na kati, beno nata bawu na  
kati,  
Beno nata bawu na bilanga ya disumu;  
Beno nata bawu na kati, beno nata bawu na  
kati,  
Beno nata bana ya fyoti na Yesu.

<sup>9</sup> Ntangu yayi yayi kele kaka mutindu, ya bamama na kubiekaka bana ya bawu ya fyoti na Mfumu. Mpe na suka yayi ya Paki, wapi ntangu ya kitoko samu na mbotika to mbiekolo, na nsungi yayi ya ntete mpe ntangu ya mvumbukulu. Beto yimba dyaka yawu na yina bayankaka ke banda.

Beno nata bawu na kati, beno nata bawu na  
kati,  
Beno nata bawu na bilanga ya disumu;  
Beno nata bawu na kati, beno nata bawu na  
kati,  
Beno nata bana ya fyoti na Yesu.

<sup>10</sup> Ntangu yayi, bankundi, mu zaba ti bawu kele, mosi na mosi, kele bébé ya kulutila kitoko na yinza. Mu zaba yawu. Mu zaba ya kulutila na kutuba kima yankaka samu na yawu. Ya kele kieleka. Mpe ya kele mutindu beno fwana kuwa.

<sup>11</sup> Ba kele mwa bimvwama yina Nzambi pesaka beno kizitu ya kukulisa. Mpe mu ke tubaka ntangu nionso, mpe mu ke tubaka mutindu yayi samu na bamama. Beto zaba, ya kusonika, ya Nsangu ya mbote yiya, Matthieu, Marc, Luc, mpe Jean. Kasi ya kele na Nsangu ya mbote ya tanu, ya kusonama ve, ya kele mama. Yandi bakaka bawu na ntwala ya Matthieu, Marc, Luc, mpe Malongi ya Jean ke baka bawu. Na yina ba me tula bizitu na zulu ya beno bamama mpe beno batata, samu na kusansa bana yayi na . . . samu na Kimfumu ya Nzambi. Mpe mu ke kwikila ti yina kele nsatu ya ntima ya beno.

<sup>12</sup> Beto ke zangula bawu na Nzambi, na kisambu, mpe beto ke sakumuna ba-bébé ya nge na Klisto. Bakuluntu mpe mu ke kwiza na ntwala, mpe nge pesa beto kaka nkumbu. Mpe ntangu yayi mu zaba ti kento ya munu kele na musoki samu na munu na kisalu yayi samu. . .

<sup>13</sup> Lisa Ann Mitchell. Oh! Lisa Ann Mitchell, kimvwama samu na maboko ya muntu nionso. Beto kulumusa bayintu ya beto.

<sup>14</sup> Tata ya Mazulu, mutindu bisadi ya Nge, beto me zangula Lisa Ann Mitchell ya fioti na Nge, na Nkumbu ya Mfumu Yesu. Beto ke sakumuna yandi mpe ke lomba luzingu ya yandi samu na Kimfumu ya Nzambi. Bika yandi zinga mpe kukula mpe kuvwanda muntu ya mbote na Kimfumu ya Nzambi. Beto ke sala yayi, samu ti, samu ti ba me tuma beto na Mfumu ya beto. Na Nkumbu ya Yesu Klisto beto ke sambila. Amen.

Nzambi sakumuna nge.

<sup>15</sup> H. A., E. J. Junior. E. J. Junior, na yina yandi kele ya kulala. Na yina beto kulumusa bayintu ya beto.

<sup>16</sup> Tata ya beto ya Mazulu, beto ke zangula na Nge mwa muntu yayi; beno sambila ti kana Yesu vutula bilumbu, Nge ke sala kisadi ya nene ya Nzambi na kubasika na yandi. Mama me pesa yandi na Nge. Mpe—mpe beto ke lakisa yandi, na Nkumbu ya

Mfumu Yesu, ti Nge ke sakumuna yandi mpe yinzo yina yandi me katuka. Bika ti ba sansa yandi na nkembo ya Nzambi, mutindu beto ke sakumuna yandi na Yesu Klisto. Amen.

Nzambi sakumuna nge, mpangi-kento, mpe mwana ya nge ya fioti. Mu ke sala keba na kosalu yina, samu mu ke vwandaka ntangu nionso na boma ti mu ke niongisa bana ya fioti.

<sup>17</sup> Mu ke bika, beno lenda baka yayi kaka mutindu yayi. . . Yayi kele mwa muntu ya ntwenya. Nkumbu? Deborah Myers. Deborah Myers ya ntwenya, yandi ke na meso ya kulezima na suka yayi. Beto kulumusa bayintu ya beto.

<sup>18</sup> Tata ya Mazulu, beto ke nata na Nge, mwa Deborah Myers, beto ke sambila balusakumunu ya Nge na zulu ya mwana. Mutindu beto ke bieka yandi na Mfumu, mutindu tata mpe mama ntangu yayi ke pesa yandi, mutindu samu na kubambuka moyo na Mfumu ya beto Yesu Yina sakumunaka bana ya fyoti, tubaka, “Beni bika bawu kukwiza na Munu,” beto ke pesa na Nge, mwa Deborah, samu na luzingu ya kosalu, na Nkumbu ya Yesu Klisto. Amen.

<sup>19</sup> Ntangu yayi nani ya bana yayi yankaka? Mbote mingi, tata. Ntangu yayi ntwenya ya bakala yayi, Sarah Ruth, Sarah Ruth Wheeler yq ntzenyq. Wheeler. Lembami.

<sup>20</sup> Tata ya beto ya Mazulu, beto ke nata na Nge bébé yayi ya luzolo yina ba pesaka na maboko ya beto samu na mbiekolo. Mpe beto me telama na bayintu ya kukulumusa mpe bantima, samu na kutonda Nge samu na yandi, mpe kusambila ti Nge ke sakumuna luzingu ya yandi na luzingu ya kosalu ya Nge. Beto ke pesa yandi na Nge na Nkumbu ya Yesu Klisto. Amen.

Nzambi sakumuna nge. Yimeni ntangu yayi. Yandi talaka na manima, mutindu kana (samu na munu) na kutuba, “Kima yankaka?” Mbote mingi.

<sup>21</sup> Ya kele na mwana-kento mosi ya mbote. Ntangu yayi yinki kele nkumbu ya nge? Mica Ungren. Wapi mutindu ya mwa kima ya kitoko yayi kele. Yinki mutindu beno ke sala? Yandi kele na boma, beno zola zaba yina ke salama awa. Beto kulumusa bayintu ya beto.

<sup>22</sup> Tata ya beto ya Mazulu, beto ke pesa na Nge mwana yayi ya luzolo na suka yayi ya Paki, na kunataka bana ya fyoti na Nge. Beto ke bieka yandi na Mfumu Yesu, samu na luzingu ya kosalu. Pesa, Mfumu, ti yandi ke zinga ntangu ya yinda, na Nkwizulu ya Mfumu, kana ya lendaka salama. Mpe sala yandi kosalu samu na Nge, mutindu beto ke bieka yandi na yandi. . . yandi na Nge, na Nkumbu ya Yesu Klisto. Amen.

<sup>23</sup> Yinki kele nkumbu ya yandi? Oh, Melynda, Melynda Ungren ya ntwenya. Bawu—bawu zola kumona nge na lweka *yayi*, Melynda. Nge kele—nge kele kitoko. Oh! Beto kulumusa bayintu ya beto.

24 Tata Nzambi, beto ke pesa na Nge mama yayi ya ntwenya, na Nkumbu ya Mfumu Yesu. Beto ke bieka yandi na Nge, luzingu ya yandi, samu na luzingu ya kusalu samu na Nge, Mfumu, sambila ti Nge ke keba yandi mpe ke sala yandi mosi ya bisadi ya Nge ya kento samu na kusadila Nge mpe kusala yina yandi me butuka na kusala. Beto me pesa yandi na Nge, na mbiekolo, na Nkumbu ya Yesu Klisto. Amen.

25 Bana-bakento yayi nionso ya kitoko! Beto mona ntangu yayi. . . Yayi, oh, awa, yayi kele mosi. Wapi faso? Wapi mutindu nge kele na suka yayi? Yinki kele nkumbu ya yandi, ntangu yayi? Jane. . . Jamie Lynn Daulton.

26 Tata ya beto ya Mazulu, beto ke nata na Nge mwana ya kento yayi ya lembami, mpe beto ke sambila ti Nge ke sakumuna yandi. Mpe beto ke lomba, Mfumu, ti Nge ke sakumuna bayinzo ya bana yayi. Bika ba sansa bawu landila bandongosolo ya Nzambi, samu na luzingu ya kusalu samu na Nge. Beto ke pesa na Nge mwa cheri yayi, mutindu beto ke bieka yandi na Nzambi, na Nkumbu ya Yesu Klisto, Mwana ya Nzambi. Amen.

Mwa bébé ya nge kele mbote.

27 Yinki mutindu beno ke sala? Mbote, ntangu yayi, beno lenda simba munu, beno lenda ve? Yinki kele nkumbu ya yandi? Teresa Cabert. Beno tala awa, Teresa. Yandi kele ve mwa kima mosi ya kitoko? Nyonso yayi kele mwa ba-bébé ya kitoko.

28 Tata ya beto ya Mazulu, beto ke pesa na Nge mwana-kento yayi ya luzolo, yina baya yandi ya luzolo me talisa na beto. Na yina beto ke simba mwana ya Nge, beto ke pesa yandi samu na luzingu ya kusalu na Nzambi. Beto ke bieka yandi na kusalu ya Nzambi, na Nkumbu ya Yesu Klisto, Mwana ya Nzambi. Amen.

29 Nzambi sakumuna nge, mpangi-kento, mpe sakumuna mwana ya nge ya fyoti na yina beto ke sambila. Mwa meso ya bleu; mpe na manima ya ntinta ya café. Yinki kele nkumbu ya yandi? Cynthia, Cynthia ya ntwenya. Tala *awa*, Cynthia. Na meso yayi ya fioti ya kitoko.

30 Tata ya beto ya Mazulu, beto ke pesa na Nge mwana-kento yayi ya fioti na suka yayi. Bika yandi zinga ntangu ya yinda, mpe bika yandi vwanda kisadi ya Nge ya kento. Bantu ya luzolo ke tulaka yawu na maboko ya munu samu na mbiekolo, mu ke nata yawu na ntwala ya bakuluntu mpe kutula yawu na ntwala ya Nzambi, mpe ke sakumuna yandi na kusalu ya Nzambi. Na Nkumbu ya Yesu Klisto, Mwana ya Nzambi. Amen.

31 Ntangu yayi, yayi kele mutindu ya fyoti, mpe. Ntangu yayi, Meda, nge fwana vwanda awa samu na kusimba yandi yayi. Mu ke wandaka ntangu nionso na boma ti mu ke buka yawu. James, James Bliss. Yandi kele mwa muntu mosi ya ndwenga, mutindu yina ve? Yawu yina.

<sup>32</sup> Tata ya beto ya Mazulu, beto ke pesa na Nge James ya ntwenya. Bika yandi vwanda mutindu yina nkumbu ya yandi ke kwisa, Jacques na kati ya Biblia, kukondwa ntembe, yina lakisaka ndwenga na kisalumu ya Mfumu. Mu ke sambila ti Nge ke sakumuna yandi, mpe samu na luzingu ya kisalumu na Nge. Sakumuna yinzo yina yandi me katuka, mpe bika ti ba sansa yandi landila bandongosolo ya Nzambi; mutindu beto ke bieka yandi na kisalumu ya Nzambi. Na Nkumbu ya Yesu Klisto, Mwana ya Nzambi. Amen.

<sup>33</sup> Ya kieleka mu zola. . . Yinki kele nkumbu ya mwana-kento yayi ya ntwenya? Kwisa awa, chérie. Hum? Tammy Brown. Bika. . . Oh, Tammy Brown ya ntwenya. Mama ya yandi mpe tata bakaka mbotika na suka yayi. Mwana-kento yankaka ya kitoko. Beto kulumusa bayintu ya beto.

<sup>34</sup> Tata, beto ke nata na Nge mwana yayi ya fioti. Mu ke banza ti ya vwanaka kima mutindu yayi ntangu bamama nataka bawu na Nge, ntangu Nge vwanaka awa, nzyetolo ya ntoto. Beto ke sakumuna yandi na Nge, Mfumu. Mutindu mu me bakula, tata ya yandi mpe mama ya yandi kubotamaka na suka yayi awa, na Nkumbu yina ya ntalu ya Mfumu Yesu. Na yina, yinzo ya yandi ke vwanda ya kusungama. Mu ke sambila ti Nge ke sakumuna yandi mpe ke pesa yandi luzingu ya kisalumu. Mutindu beto ke bieka yandi na Nzambi samu na kisalumu ya Yandi, na Nkumbu ya Yesu Klisto, Mwana ya Yandi. Amen.

<sup>35</sup> Matondo. Oh, beno vingila, beno lemvo kila munu, mu monaka yayi ve. Wapi faso? Mbote, wapi mutindu ya muntu ya mbote. Mu lenda simba. . . Beno lenda banza? Mbote. Yinki kele nkumbu ya yandi? Danny Johnson, Danny William Johnson. Oh, la la, yandi ke monana mutindu mulongi, mutindu yina ve?

<sup>36</sup> Tata ya Mazulu, beto ke nata na Nge mwana-bakala yayi ya fioti. Ya lendaka vwanda ti yandi kele ntwenia mingi samu na kuzaba yina yayi kele, kasi ya kele na Nzambi na Mazulu Yina ke talaka na yisi mpe zaba kima yayi. Beto ke pesa yandi na Nge, Mfumu, mutindu mama tulaka yandi na maboko ya beto. Na lukwikilu beto ke kwisa na Nkumbu ya Yesu Klisto, mpe beto ke lombola yandi mutindu trophée ya lemvo ya Nzambi, mpe sakumuna yandi na Nzambi, na Nkumbu ya Yesu Klisto. Amen.

Sakumuna nge, ya luzolo.

<sup>37</sup> Beto me kuzwa bawu nyonso? Ntangu yayi wapi mutindu ya mwa mwana ya kento ya kitoko yina vwanaka kwiza awa! Ya kele mwa robe ya kulutula kitoko yina kele na beno, mpe mwa yimpu. Adler, Adler, Ellen Gail Adler, yayi kele mwana-kento ya ntwenya ya kitoko.

<sup>38</sup> Tata ya beto ya Mazulu, mu me kangama na Nge kimvwama yayi ya yinzo, mwana-kento yina kwisaka na yinza. Mpe muntu ya luzolo yina ke nata yandi na ntuala samu na kisalumu ya Nge, na kuzabaka ti kilumbu yayi ya yimbi yina beto ke na kuzingila.

Beto ke lomba luzingu ya mwana mutindu trophée ya Nzambi. Mpe beto ke bieka yandi na kosalu ya Nzambi, na Nkumbu ya Yesu Klisto, Mwana ya Nzambi. Amen.

Sakumuna nge, cherie.

<sup>39</sup> Yayi kele mwana-bakala ya ntwenya ya mulongi, bawu kele zole. Bawu kele mapasa? Tanu mpe Nana. Yinki kele nkumbu ya mosi yayi? Johnny. Ya Richmond, ya Richmond, na Virginie. Mu banzaka ti mu me bambuka moyo na kizizi ya nge. Beto me solola kintwadi. Ntangu Mfumumu vwandaka awa. Mu lendaka ve kubambuka moyo na beno; mu zabaka kizizi ya beno mpe mu lendaka ve kusala nani beno vwandaka. Mbote mingi. Mbote, beto zaba ti yandi ke kwisa na yinzo ya mbote. Nkumbu ya yandi kele Jean, Jeanny.

<sup>40</sup> Tata ya beto ya Mazulu, beto ke nata na Nge mwana-bakala yayi ya fioti, Jeanny. Mpe beto ke tentika maboko ya beto na zulu ya yandi, samu ti ya kele mutindu Nge salaka yawu. Nge tentika maboko ya Nge na zulu ya bawu. Mpe beto ke sakumuna yandi mpe ke lomba luzingu ya yandi mutindu trophée ya lemvo ya Nzambi, ke sakumuna yandi na kosalu ya Nzambi, na Nkumbu ya Yesu Klisto, Mwana ya Nzambi. Amen.

Sakumuna nge, mwana-bakala ya fioti.

<sup>41</sup> Lewis, yayi kele Lewis.

Tata ya Mazulu, beto ke nata na Nge mwana-bakala yayi ya fioti, Lewis. Mpe tata nataka yandi na ntwala samu na mbiekolo na lukutakanu na yinzo ya Nzambi.

<sup>42</sup> Mutindu beto ke banza na bilumbu me luta, ntangu Anne kwendaka na tempelo, mpe sambilaka, mpe Nzambi pesaka yandi bébé. Mpe yandi vutulaka bébé yango mpe pesaka yandi na Nzambi. Ya kele yina bantu yayi ke salaka bubu yayi, ke kotisa bana ya bawu ya fyoti, mwa bimvwama ya bawu, ke sakumuna bawu. Mpe—mpe profete bakaka yandi, Tata, mpe vumbulaka mwa muntu yango, mpe yandi kumaka profete.

Ntangu yayi beto ke sakumuna mwa Lewis yayi na lukutakanu ya Nzambi ya Ngolo nyonso na suka yayi, na Nkumbu ya Yesu Klisto. Amen.

Sakumuna nge, mwana.

Kieleka mbote na kumona nge awa na Richmond, na Virginie, na suka yayi. Nzambi sakumuna nge.

<sup>43</sup> Ntangu yayi beto mona, ti yawu? Mbote mingi. Oh, ya kele bana yango ya fyoti! Beno zaba ve, munu, beto lendaka sakumuna mwa ba-missionaire na suka yayi, mpe mulongi, beto zaba ve. Ti nyonso kele na maboko ya Ngolo nyonso.

<sup>44</sup> Mu zola kusamuna ti balukutakanu na nkokila yayi, awa na tabernacle, kisika ya ke vwanda na lukutakanu ya mbundana. Mpe kana beno me kwisaka ata fioti ve na mosi ya bisalu ya

munu ya kominyo, beto ke salaka dyaka kisalu ya kusukula makulu.

<sup>45</sup> Ntangu yayi, ya kele na bamuswale awa samu na munu na kusambila. Mosi kele ya Mpangi Grimsley, mpangi ya beto ya bakala awa na dibuundu. Mu zaba ve nani bayayi kele. Beto ke tinda bayayi, bankama na bankama ya bawu, na yinza ya muvimba. Mpe ntangu yayi beto ke . . . Mu zola kusambila samu na bawu na manima mu me banda na kusambila samu na bambevo.

<sup>46</sup> Mu zola kuzonzila ntete, kaka mwa ntangu fyoti, na zulu ya mwa Nsangu ya Paki. Mpe ntangu yayi ntete beto belama na Ndinga ya Nzambi, beto belama na Yandi na kisambu.

<sup>47</sup> Tata ya beto ya Mazulu, beto ke vutula matondo na kati ya bantima ya beto na suka yayi samu na suka yayi ya nkembo. Mpe na zulu ya nionso yina, beto ke vutula matondo samu na yayi yina yawu ke talisa, mvumbukulu mpe me tula kidimbu na nzikisa ya nsambulu ya beto, ntangu Yesu Klisto vumbukaka na lufwa, bamvula mafunda zole me luta, mpe kukitalisaka Yandi mosi na Dibundu ya Yandi, ya moyo ya mvula na mvula. Na manima ya bamvula mafunda zole, beto kele na kyese mingi na kuvwanda dyaka na kusepela na kubundana yango na bilandi ya Klisto yina vumbukaka na lufwa! Beto ke sambila, Mfumu, ti Mvwandulu ya Yandi ke vwanda mingi na kati ya yinzo yayi na suka yayi, tii muntu nionso awa yina me vuluka ve ke ndima Yandi mutindu Mvulusi ya bawu. Mpe bayina me fuluka ve na Mpeve ya Yandi, bika ti yayi kuvwanda kilumbu ntangu Mpeve-Santu ke sala kisalu yina me mana na zulu ya bawu. Beto ke lomba ti Yandi, na Kukatula-masumu ya Yandi ya nene yina belusaka bambevo, ti Yandi belama mingi na bantu, ti lukwikilu ke vwanda na luyalu, Mfumu, mpe ya ke yala na zulu ya kukondwa lukwikilu, yina ke sala bambevo mpe bantu ya mpasi na kukwenda ntama awa kubeluka mpe mbote.

Beto ke lomba, Mfumu, ti Nge ke sakumuna yandi ntangu yayi yina ke talisa Ndinga ya Nge, ya mvumbukulu.

Nzambi, sakumuna milongi nionso bisika nionso, bana ya Nge, bisadi ya Nge na yinsi ya muvimba, na yinza ya muvimba.

<sup>48</sup> Mpe kwisa, Mfumu Yesu, na nswalu nionso, samu beto ke mona matuti ke tepa-tepa na zulu, Mfumu, na yina beto zaba ti ya kele na kima mosi ya nene ke tambula. Kanga mukaba ya bantu ya Nge. Oh, bika ti bawu baka mbele ya Lukwikilu, bawu lwata kinwaninu, bawu kulumusa yimpu, bawu lwata sapatu ya Nsangu ya mbote, mpe, na zulu ya bima nionso, bawu baka lukwikilu yina ya kisengo mpe bawu kwenda na ntwala. Pesa yawu, Mfumu, samu ti matuti ya mvita kele ya kunamika kuna. Sakumuna beto bubu yayi ntangu yayi, samu ti beto zaba yawu ntama mingi ve, beto ke mona Yesu ntama mingi ve. Mpe beto ke sambila ti beto ke kubama na kukwenda ntangu ngunga yina ke



kwisa. Bika ti beto yidika bantima ya beto, mpe kumanisa yawu, kusukisa yawu mbala mosi samu na nionso, na lukutakanu ya suka bubu yayi. Na Nkumbu ya Yesu Klisto, tuba na beto na nzila ya Ndinga ya Nge, Ndinga ya Nge kele Kieleka. Amen.

<sup>49</sup> Ntangu yayi samu na beno yina ke zola kutanga na munu na Masonuku, beno baka Luc, kapu 24. Mpe mu zola kutanga mwa yinda ya Yawu awa, kana Mfumu zola, samu na kuzwa dibanza na yina mu zola kuzonzila baminuti fyoti. Mpe ntangu yayi kana beno zola, kana ya kele tiya, mu banza, to nyonso yina, beno ke sala kaka beno mosi mbote mutindu beno lenda, mpe mu ke vwanda kaka na nswalu nyonso.

<sup>50</sup> Mpe beto zola tuba yayi, ti kieleka beto ke sepela na kukwikama ya beno na kukwisa. Mpe ntangu yina, ata ti bantu ke meka na kutuba ti Nsangu ya mbote me zimbisa kubenda ya Yawu, mpe ntangu bantu me katuka na yinsi ya muvimba samu na kutelama na kisika yina bintala ya bawu ke na kusalaka mpasi, samu na kisalu ya Mfumu, ya ke lakisa kaka ti Nzambi kele na bantu, mpe ya kele dyaka na nsatu na kati ya ntima ya bawu samu na kumona Nzambi. Kasi, Nsangu ya mbote na kati ya kukikulumusa ya Yawu, kaka ya kukikulumusa mutindu Nsangu ya mbote ya Mfumu ya beto Yesu Klisto kele, kasi Yawu kele ngolo ya kulutula nene yina me bulaka ntoto, ya kele Nsangu ya mbote ya Klisto. Mpe Nsangu ya mbote kele kaka ve na kati ya Ndinga, kasi na nzila ya ngolo mpe kumonisama ya Mpeve-Santu. Bika ti Yandi pesa beto bima yayi mutindu beto ke tanga ntangu yayi na nzila ya 36 ya kapu 24 ya Santu Luc.

*Mpe mutindu bawu . . . tubaka, Yesu yandi mosi telamaka na kati-kati ya bawu, mpe tubaka na bawu, Ngemba kuvwanda na beno.*

*Kasi bawu vwandaka na boma mpe tekitaka, mpe banzaka ti bawu monaka mpeve mosi.*

*Mpe yandi tubaka na bawu, Samu na yinki beno kele ya kudasuka? mpe samu na yinki mabanza ke telama na kati ya bantima ya beno?*

*Beno tala maboko ya munu mpe makulu ya munu, ti ya kele munu: beno simba munu, mpe beno tala; samu ti mpeve kele ve na nsuni mpe mukwa, mutindu beno ke mona munu ke na yawu.*

*Mpe ntangu bawu vwandaka . . . zonga, yandi talisaka bawu maboko ya yandi mpe makulu ya yandi.*

*Mpe na ntangu yina bawu vwandaka ntete ve samu na kiese . . . bawu . . . bawu kwikilaka ve samu na kiese, mpe bawu vwandaka kukiyufula, yandi tubaka na bawu, Beno kele awa na nsuni?*

*Mpe bawu pesaka yandi kitini ya . . . tokisaka mbisi, mpe . . . kinkuku ya mafuta ya niosi.*

*Mpe yandi bakaka yawu, mpe yandi kudiaka yawu na ntwala ya bawu.*

*Mpe yandi tubaka na bawu, Yayi kele bampova yina mu zonzaka na beno, na ntangu yina mu vwandaka ntete na beno, ti bima nionso fwana salama, yina ba sonikaka na musiku ya Moise, mpe na baprofete, mpe na psalms, samu na munu.*

*Mpe yandi zibulaka...lubakusu ya bawu, ti ba lendaka bakula masonuku,*

*Na yina tubaka na bawu, Mutindu ba sonikaka yawu, mpe mutindu ya lendaka salama ti Klisto ke tala mpasi, mpe samu na kuvumbuka na lufwa na kilumbu ya tatu:*

*Mpe ti kubalula ntima mpe mulemvo ya disumu zolaka longama na nkumbu ya yandi na kati-kati ya bayinsi nionso, kubanda na Jerusalem.*

*Mpe beno kele bambangi ya bima yayi.*

*Mpe, tala, mu ke fidisa nsilulu ya Tata ya munu na zulu ya beno: kasi beno vwanda na mbanza ya Jérusalem, tii kuna beno ke vwanda...tii kuna beno ke vwanda ya kufulukuka na ngolo ya mazulu.*

*Mpe yandi twadisaka bawu tii kuna na...Béthanie, mpe yandi telemisaka maboko ya yandi, mpe sakumunaka bawu.*

*Mpe ya salamaka, na yina yandi sakumunaka bawu, yandi bikaka bawu, mpe mataka na zulu.*

*Mpe bawu sambilaka yandi, mpe vutukaka na Jérusalem na kiesa ya nene:*

*Mpe bawu vwandaka ntangu nyonso na kati ya tempelo, vwandaka pesa lukumu mpe vwandaka sakumuna Nzambi. Amen.*

Ntangu yayi kana mu lendaka bokila yawu mutindu dilongi, mu ke zola kubaka yayi, *Kidimbu Ya Kieleka Ya Paki*.

<sup>51</sup> Mutindu mu me kwiza na kubanza na kima ya mutindu yina, ya vwandaka pene ya lumingu me luta mu vwandaka na nzila ya munu, kuna na Georgetown, mwa mbanza mosi na nsi ya New Albany awa. Mpe ya vwandaka na bana ya babakala ya kutelama na bala-bala, yina vwandaka baka makabu samu na bidimbu ya Paki. Mpe mu bandaka na kubanza na “kidimbu ya Paki.” Mpe mu banzaka, “Yinki kele kidimbu ya Paki? Kieleka, ya zola kutuba mingi kulutila yina bana ya babakala yayi ke na kubaka makabu, kidimbu ya Paki.” Mpe mu banzaka, “Yinki bawu ke sala na bidimbu ya mutindu yina, mpe na mambu yina me katuka na bawu, to samu na bawu?” Ba me tula yawu, ya kieleka, bidimbu yayi, na zulu ya mikanda mpe nyonso. Mpe ya kele dikabu ya kimpwanza samu na bawu, mpe ya ke tula

bantu na lupitalu, yina kele na tuberculose, mpe nionso yina, mpe ba ke tula bawu na lupitalu, na kisika ya kupema, tii kuna ba ke manisa. Mpe mu banzaka, “Ya kieleka, Paki kele na kima ya kulutula yina, kidimbu ya Paki. Ya zolaka tuba kima mosi kulutula kutula na kisika muntu mosi na lupitalu, samu na kukindisa yandi.” Na yina, ya kele kieleka mbote, ntangu yayi, mu kele na dyambu ve na yawu. Ti, Nzambi sakumuna bawu, ya kele kima mosi ya mbote. Kasi dyaka, ya ke monana ti ya fwana kwenda kaka mwa ntama mingi kulutula yina, na kuvwandaka Paki yina zolaka kutuba mingi na Dibuundu ya Baklisto mpe na difwa ya beto ya Muklisto, Kidimbu ya mvumbukulu. Mpe wapi mutindu mwa dikunzi ya fioti, mutindu, kubaka kisika ya Yawu? Ya lendaka ve.

Na yawu mu bandaka na kubanza na yawu, “Yinki vwandaka Kidimbu ya Paki?” Mpe ya kele mutindu mu me baka dibanza yayi ya kuzonza na suka yayi na Kidimbu ya Paki.

<sup>52</sup> Ntangu yayi Paki kele na yawu, mpe bidimbu, mpe nionso yina, kele na kati ya Biblia. Beto ke mona bawu, bawu kele kiboba mutindu Biblia kele, nzila nyonso na nsaba ya Eden beto ke mona yawu. Mpe na yina beto ke mona ti kima nyonso yina beto ke mona kisika mosi na kati ya Biblia, ke vutuka na Genèse. Yawu nyonso bandaka na Genèse.

<sup>53</sup> Mpe na yina mu vwandaka banza yawu, yina mu vwandaka na yawu na dibanza ya munu mutindu Kidimbu ya Paki, na yina mu vwandaka kukiufula samu na yinki ba losaka Yawu, mpe mutindu ti bantu ke manga Yawu. Samu na yinki Yawu vwandaka ya kufundisa mingi? Mpe mu vwandaka banza na yina ti Yawu ke vwandaka ntangu nionso ya kufundisa ve, mpe bantu nionso ke fundisaka Yawu ve.

<sup>54</sup> Kasi Nzambi salaka kieleka nzila mosi, ti ba me tula muntu na kisika yina ba me tuma yandi na kubaka lukanu mosi. Muntu lenda zinga ve na zulu ya ntoto kukondwa kubaka lukanu. Nzambi ke pusa yandi. Yandi fwana baka lukanu mosi. Mpe ya kele na ntangu yina beno fwana baka lukanu samu na lukolo, beno fwana baka lukanu ya nani beno ke kwelana, mpe beno fwana baka balukanu ya bima ya luswaswanu.

<sup>55</sup> Kasi na disamba ya Eden, kisika ba vwandaka kaka na bana-babakala zole, ba vwandaka pusa bawu na ngolo na muntu na kubaka lukanu. Mpe mu banza ti ya me salama samu na kulakisa ntinta ya yandi ya kieleka, yina yandi kele, samu na kulakisa yina yandi kele na kati ya yandi. Ntangu yayi beto ke mona ti ntangu kwizaka, na kati-kati ya Caïn na Abel, ti lukanu zolaka vwanda na ngolo, samu ti ntangu ya kusambila kwisaka, mpe konso mwana-bakala kubikaka nzila samu na kusambila Nzambi.

<sup>56</sup> Mpe kana beno tala, na kati-kati ya mbote mpe yimbi ya kele kaka na mwa mupepe mosi ya luswaswanu. Mpe yimbi, na

bilumbu ya nsuka, pesaka profesu ti ya ke vwanda pene-pene mingi na diboko ya kibakala, ti ya ke vuna bantu ya kieleka ya Kusolama kana ya lendaka salama, na kati-kati ya mbote mpe yimbi.

<sup>57</sup> Ntangu yayi, na kati ya bana, mutindu bawu kwizaka na ba-autel ya bawu, mpe salaka kusambila. Ntangu yayi mu vwandaka banza kuna na ba-autel yikwa na suka yayi, na mabuundu bafololo yina ya kitoko kele ya kutula na zulu ya ba-autel. Mpe ya kele nyonso ya kulunga. Mu ke telemina yawu ve. Kasi ya ke monana kaka na nsuka ya kusambila, ya kele kutula mwa bafololo na autel, to—to dibuundu mosi ya kitoko, to bakizama ya mbote to kima mosi, mpe yina ke monana na nsuka ya yawu.

<sup>58</sup> Mpe ya vwandaka mutindu yina na Caïn, samu ti yandi kotisaka bambuma ya bilanga, mpe salaka kisalu ya yandi na Nzambi, mpe ba losaka yawu samu ti yandi kwizaka ve na nzila ya mbote mpe nzila ya ntete yina Nzambi tumaka yandi na kukwisa. Kasi yandi pesaka munkayulu ya yandi, mpe salaka nyonso ya nsambulu kaka mutindu mpangi ya yandi ya bakala, kasi ba losaka yandi. Mpe samu ba losaka yandi na lweka ya kimpeve, na yina ya salaka ti musoki mosi kutelema na kati ya yandi, samu yandi vwandaka na muyimi.

<sup>59</sup> Ya kele na kati ya muntu, yandi lenda ve kusadisa na kuvwanda yina yandi kele, samu ti yandi me butuka na konditsyo yina. Muntu me talisama na Mazulu mutindu nsumuki, na nzila ya nsumuki. Mu vwandaka tubila yawu na mwa ntangu fioti me luta, mpe muntu mosi tubaka, “Na yina ya kele ve ya kulunga. Kana ba fwana talisa munu na nzila ya muntu mosi yina ke tumamaka ve, na yina mu ke na siansi ve.”

Mu tubaka, “Ya kele kieleka, samu ti nge me butuka musumuki, kasi nge me talisama. Beno kele ya kufundisa samu na lufundusu, na nzila ya kitalisi.”

<sup>60</sup> Mbote, na yina, yina ke monana yimbi mingi. Kasi beno balula yawu na lweka yankaka, na yina beto kele ba tumaka beto na Luzingu ya Kukonda nsuka, na nzila ya kitalisi. Kisika mosi monikisaka beto, na lufwa; Yankaka monikisaka beto na Luzingu ya Kukonda nsuka, na yina ya ke vutula beto diaka na ntuala ya Kiti ya kimfumu. Konso muntu ke vutuka kaka na kisika mosi, samu na kusala nsodolo ya beto.

<sup>61</sup> Kasi muyimi yina vwandaka ntangu nyonso, mbote mpe yimbi, yimbi ke na kumekaka na kununga mbote. Yawu bandaka na Eden, mpe yawu lutaka na kati ya bansungi. Yawu me kulumuka tii yawu me kota na mambu ya yinsi. Yawu me kulumuka tii na kati ya mambu ya dibuundu. Ya me kulumuka tii ya me kota na kati ya luzingu ya yinzo. Muyimi, ke meka na kuyala to kubebisa, ke meka na kununga, kupusa. Mpe beto ke mona kima mosi na kusalaka bisika nyonso, mpe ya

ke vwandaka ntangu nyonso, kima mutindu mosi, ke meka na kusala to kulutila.

<sup>62</sup> Nzila nyonso ya Ngwisani ya Ntama, Nzambi, na bilumbu ya baprofete, na manima. Mu kele na mingi ya yawu ya kusonika awa, yina mu ke kuzwa ve ntangu ya kukuma. Kasi, Nzambi, na bilumbu ya baprofete ya ntama, na kati-kati ya nyonso, mutindu Yandi salaka na nsaba ya Eden, ntangu Ndinga ya kieleka ya Nzambi mpe bisambu ya kieleka ya Nzambi vwandaka ya kufundisa, mpe ba fidisaka yandi mpe kufwaka, na kati ya disamba ya Eden, mpe Ndinga ya Nzambi fikamaka na nzila ya muyimi mpe musoki, ya vwandaka mutindu yina na dibuundu kubanda, na kumekaka na kukanga swi Ndinga ya kieleka ya Nzambi.

<sup>63</sup> Kasi kana beno tala, kaka na ntangu ndinga ya Abel vwandaka swi, na lufwa, Nzambi telemisaka Seth na kubaka kisika ya yandi. Yina vwandaka kima yankaka ve kasi Paki ya mantwala, mvumbukulu ya mantwala, to kiyingilu tii kuna mvumbukulu kwisaka. Yina landilaka na mwa ntangu fioti, kuna na kati ya Ngwisani ya Ntama beto ke mona yawu ke landila. Baprofete, Nzambi bumbaka Ndinga ya Yandi ya moyo na baprofete. Bawu zonzaka Ndinga ya Nzambi; mpe bawu losaka bawu matadi. Mpe kaka na ntangu bawu vwandaka losa matadi na mosi mpe vwandaka bengana yandi, Nzambi vwandaka telemisa mosi yankaka. Mpe bawu vwandaka losa matadi na mosi yina mpe vwandaka manga yandi, Nzambi vwandaka telemisa mosi yankaka. Yandi ke kebaka ntangu nionso mabangi ya Yandi ya moyo. Na kati ya bansungi Yandi bumbaka Ndinga ya Yandi ya moyo na ntwala ya bantu, kubanda na Eden.

<sup>64</sup> Mpe ntangu yayi beto ke mona ti, kaka na ntangu Cain bakulaka ti yandi salaka yina yandi salaka, mbote, yandi basikaka na Mvwandulu ya Nzambi, mpe ba tulaka yandi kidimbu na Nzambi, na nzila ya kidimbu ba tulaka yandi na zulu ya yandi. “Yandi basikaka,” Biblia ke tuba, “na disamba ya Eden, na mielo ya disamba, na este ya Eden,” yandi basikaka, yandi tulaka kiniemo, yandi tulaka kidimbu, yandi basikaka na Mvwandulu ya Nzambi. Yinki kima!

<sup>65</sup> Wapi mutindu ya kima ya nene, ti Cain, samu na musoki, mpe samu na zola ve kuvutula ngwisani na Nzambi na mutindu mosi ya kulunga yina mpangi ya yandi ya bakala kwizaka. Nzambi tubaka na Cain, “Kana beno sambila mutindu Abel, beno ke sala mbote.”

<sup>66</sup> Kasi Cain mutindu mosi tubaka, “Beni tala yina mu me vukisa. Yayi kele yina mu me kuzwa, beno tala yina mu me pesa. Beni baka yayi to beno bika yawu, to mosi Beni zola sala, beno vwanda kaka ya kulunga Beni mosi.”

<sup>67</sup> Ntangu yayi yina kele mutindu ya nkadulu ya bantu ntangu nyonso, na kati ya luzingu ya dibuundu, na kati ya luzingu yankaka. “Kana . . .” ba ke tuba, “Mu ke kwendaka na yinzo-Nzambi. Mu—mu—mu ke sadisaka dibuundu, mu—mu ke salaka yayi. Kana Nzambi lenda ve kundima yawu, ya kele ya kulutila mbote mu lenda sala.” Beno me mona? Kasi ya kele kaka ve ti Nzambi ke lombaka. Nzambi ke lombaka yawu ve.

<sup>68</sup> Nzambi ke lombaka nzila yina ba me kubika. Yandi kubikaka nzila, mpe Yandi ke lombaka beno na kundima yina Yandi kubikaka, beno me mona. Yandi ke na nsatu ve ya lusalusu ya beto na kutuba na Yandi yinki kusala mpe wapi mutindu kusala yawu. Yandi me sala nzila samu na beto na kusala, mpe bima yina beto lendaka sala, mpe mutindu beto lendaka sala yawu, mpe Yandi ke na nsatu ya mabanza ya beto ve na yawu ata fioti ve. Beto ke kwisa mutindu yina ve. Kasi beto ke mona ti bantu me tumama na kusala yawu, nzila nyonso ya nsungi. Kasi Nzambi bumbaka Ndinga ya Yandi ya moyo na baprofete ya Yandi, mpe nionso yina, na kati ya nsungi mutindu Yandi kwisaka. Mpe beto ke mona yawu bubu yayi.

<sup>69</sup> Mpe beto ke mona yawu na kati ya bapolitiki. Mu kele na mwa bima awa samu na politiki, ti mutindu beto ke mona mpe na kilumbu yayi kisika beto kele, ti bantu me tekisa bukuluntu ya bawu samu na politiki. Mpe kana mosi ve na kati ya beno me bakaka bande yina mu tubaka, kuna na Middletown, na Ohio; na Lumingu, sabala mosi me luta; na Jézabel mpe Achab, mu zola ti beno kuwa yawu ntangu yankaka. Mpe wapi mutindu yinsi, samu na muyimi, mpe mwa ba-dollar ya kulutila, mpe dibanza ya kulutila kuzabana na kati-kati ya bantu, kieleka ba me tekisa Klisto kaka mutindu Judas salaka bamvula mafunda zole me luta, na bambongo makumi tatu ya kisengo. Oh, ya kele kima kulutila nene, na kubanza ti konditsyo yina ke zinga na kati ya yinsi yayi mpe bantu yayi bubu yayi! Na kubanza ti bamvula mingi me luta, ba zolaka sala ata fioti ve kima ya mutindu yina. Kasi bubu yayi bawu kele ya kufuluka na muyimi, ba ke na kumekaka na kuzwa mbongo mingi, ba ke na kumekaka na kuzwa bantangu ya kukondwa mpasi mingi. Ntangu yayi ya kele, ya kieleka, ya buklisto ve.

<sup>70</sup> Muklisto ke lombaka ve bima ya kukondwa mpasi. Beto kele ve . . . Ya kele na bansilulu mingi bubu yayi yina ba me sala na kati-kati ya bantu ya Baklisto, balongi mingi ke pesaka nsilulu na bantu kima ya luvunu, “Kana nge lenda kwiza kaka na Klisto, bampasi ya nge nyonso me suka.” Mu ke tuba na beno, ntangu beno ke kuma na Klisto na ntangu yina beno ke banda. Ya kele ntangu beno ke lwata uniforme mpe beno ke baka munduki, mpe beno ke kota na kilanga ya bitumba. Nzila ya Muklisto yayi kele ve mbeto ya kukondwa mpasi. Ya kele bitumba kubanda ngunga yina beno ke banda, tii kuna mpeve ya beno ke vwanda na kimpwanza na lufwa. Beno kele ve na pikiniki. Beno kele na

kisika ya bitumba. Mpe na yina ba silaka beto bima.

<sup>71</sup> Mpe mu me kuma, bantangu yankaka, mu ke zolaka ve kutuba yayi, kasi mu zola kutuba yawu na ntima ya munu, ti mu me vwalangana ntangu mu ke kuwa mingi lukwikilu ya kulutila nene, nsambulu ya kulutila nene. Mpe nyonso bubu yayi me kuma kima ya ba-sensation. Ya—ya kele muntu ya ba-sensation ya ba-sensation. Mpe televizyo me zibula nzila na kati ya ba-astronoute, mpe nionso yina, mpe nkonga ya buzoba, ya nene mingi. Oh. Mpe bawu ke basisa mpe na kubeluka ya Kinzambi bubu yayi, bakubeluka ya nene mingi. Ntangu yayi, Nzambi ke vwandaka ve na bima ya mutindu yina. Ba ke nata bantu, bambala mingi, na estrade, mpe bantu ya makabu, kukondwa ntembe, kasi na lubakusu ya Nsangu ya mbote, tula mafuta na zulu ya bawu, mpe kusambila, mpe kutelama kuna, mpe kuningisa bawu tii kima mosi ke salama; bawu ke beluka. Mpe mu banza ti muntu yina ke zinga na kati ya disumu, mpe bawu ke vutuka mpe ke mona yawu ke vutuka dyaka na zulu ya bawu. Mu banza ti bawu vwandaka na nsi ya luzatu na ntangu yina, yina lukwikilu ya Nzambi yina bawu kutikaka belusaka bawu, kasi ntangu ba ke basika na kati-kati ya bantu ya kukondwa lukwikilu, ya ke vutuka diaka. Ya ke sala yawu konso ntangu.

Yina beto ke na yawu nsatu bubu yayi kele kubeluka ya Kinzambi, kele balukanu yina ba me zenga samu na Klisto! Kieleka.

<sup>72</sup> Mu vwandaka tanga mukanda ntama mingi ve yina ba tindaka munu na Kimvuka ya ba-Lutherien, na Allemagne, kisika mpangi mosi ya bakala bikanaka, mpe yandi vwandaka na lukutakanu ya kubeluka na Allemagne, na kusimbisa dibuundu ya ba-Lutherien mpe ba-Pentecotiste, mpe nionso yina. Mpe kopi yayi ya mukanda sonikaka: “Mpe yandi tubaka, ‘Nge ke longaka kubeluka yina ya Kinzambi; ti nyonso yina bawu fwana sala kele, beno tentika maboko ya beno na zulu ya bawu, mpe bawu ke kuwa kima mosi, mpe ke beluka.’ Yandi tubaka, ‘Kieleka mu ke na luswaswanu na nge.’ Yandi tubaka, ‘Na yina wapi mutindu samu na mwa Deborah Stadskev ntangu yandi kufwaka kuna? Mwana mosi ya kulunga, ya mavimpi ya mbote kilumbu mosi, mpe bangunga fioti vwandaka landa yandi ke na kufwaka. Mpe beno nyonso kwendaka kuna, mpe beno sambilaka, mpe beno ningisaka yandi, mpe beno pakulaka yandi, mpe nyonso, samu na kubeluka, mpe ya vwandaka ve na luzingu. Bébé vwandaka kuna.’ Yandi tubaka, ‘Na yina bawu salaka telegramme na Mpangi Branham, mpe yandi tubaka ata fioti ve kima mosi tii kuna yandi bakaka lukanu ya mbote ya Nzambi, mpe na manima kukwiza na Nkumbu ya Mfumu Yesu, samu na kutuba Ndinga.”

<sup>73</sup> Ntangu yayi yawu yina beto ke na yawu nsatu, kubaka lukanu ya kuvedila na Nzambi. Yawu yina beto fwana kwisa. Ya kele samu na yina beto ke botikaka na Nkumbu ya “Yesu

Klisto,” ya kele lukanu ya kuvedila na Ndinga ya Nzambi. Ya kele samu na yina beto ke kangamaka na bima yina beto ke salaka, samu ti yawu kele Bantumunu ya Nzambi mpe Nsangu ya mbote ya Nzambi. Mpe beto fwana bikana na Yawu kaka mutindu Yawu kele ya kusonika. Ata ti beno me wisana, ata ti beno me yina, ata ti nionso yina ke salama, yina ke na kima mosi ve ya kusala na Yawu. Nzambi zola baka balukanu ya kuvedila. Mpe wapi mutindu beno lenda sala yawu ntangu beno zaba ti beno kele na foti na kubanda? Beno lenda ve kuzwa lukanu ya kuvedila na Nzambi. Wapi mutindu beno lenda kwisa mpe kulomba kubeluka ya Kinzambi ntangu beno ke zaba ti ntima ya beno kele ve ya kusungama na Nzambi, samu na kusadila Yandi? Beno me mona, beno zola kuvutuka mpe kusala bima yina kele na yinza. Ata mbala mosi ve ti beno ke beluka mutindu yina, beno me mona. Beno fwana kuma ya kutsyema na ntwala ya Nzambi, mpe kusakumuna luzingu ya beno mpe ntima na Nzambi, mpe kuna Nzambi ke belusa. Mpe ya ke wumela kuna, samu ti lukwikilu ya beno me kangama.

<sup>74</sup> Ntangu yayi ya kele na kati, beto ke mona ti muyimi, ata ti, na dibuundu, mpe na politiki, mpe na mambu ya yinsi. Yinsi mosi, beno tala awa na Afrika ntangu yayi, yinki ke salama. Beno tala, samu na muyimi, beno tala yina salamaka kuna ntangu yayi na Afrika; kaka kuna ve, kasi bisika nyonso na yinza, bisika nyonso, samu ti muntu zola kuvwanda muntu mosi. Bawu, nyonso yayi bawu me kuzwa, kele kaka awa na zulu ya ntoto, to, bawu ke zinga mutindu yina.

<sup>75</sup> Kana yayi vwandaka nyonso yina mu kuzwaka, mu zolaka vwanda muntu ya mawa. Mu ke na kusosa Mbanza yina Mutungi mpe Kiyidiki kele Nzambi. Ya kele kisika beto ke tulaka bimvwama ya beto, samu na lukanu yina.

<sup>76</sup> Bana ya Caïn, to mu zola kutuba bana ya Satana, bawu kele bana ya Satana samu ti Caïn vwandaka mwana ya Satana, mpe na yawu, kuna, bana ya Caïn bubu yayi. . . Mpe beno ke tuba, “Nge ke ndima yawu, Mpangi Branham?” Yinga, mu kele. Mu ke ndima yawu. Samu. . . beno kuwa.

<sup>77</sup> Yesu, ntangu Yandi vwandaka awa na zulu ya ntoto, Yandi tubaka na nswalu na bantwadisi ya misambidi yayi ti, “Beni kele ya tata ya beno, dyabulu.” Kasi bawu vwandaka bantu ya kinzambi, mpe bawu vwandaka misambidi, mpe bawu vwandaka bantu ya mayela mingi, mpe bawu vwandaka na bayinzo ya nene, bawu vwandaka na mabuundu ya nene, mpe bawu vwandaka na balenda ya nene, mpe kinganga-nzambi, mpe bantumunu, mpe nionso yina, kasi bawu zabaka ve Nani Klisto vwandaka. Bawu lembanaka na kusimba kilumbu ya bawu.

<sup>78</sup> Mpe mutindu bawu salaka kuna, mutindu mosi bawu ke sala ntangu yayi, kaka kieleka mutindu mosi. Bawu lembanaka



na kubakula kilumbu yina beto ke na kuzinga, mpe bima yina Nzambi ke na kusalaka. Ntangu yayi beto ke mona yawu, ke tula . . . Kana bantwadisi ya misambidi yina . . .

<sup>79</sup> Ntangu yayi yawu yayi! Kana bantwadisi yina ya misambidi na kilumbu yina ba bokilaka bana ya diabulu, beto zaba ti diabulu, na mbandukulu, vwandaka yandi yina twadisaka na kimpeve Caiin samu na kutalisa mpasi mpangi ya yandi ya bakala mpe samu na kufwa yandi. Ya kele kima mutindu mosi yina salamaka na nzila ya bantwadisi mosi yango yina talisaka mpasi na Yesu Klisto mpe kufwaka Yandi. Ba vwandaka tuma bawu na kubaka lukanu kaka mutindu ba vwandaka pusa bawu kuna na disamba ya Eden. Ba tumaka bawu na ngolo na kubaka lukanu, “Mbote, yinki samu na Yayi?” Bana ya Caiin, bana ya Satana.

Beno ke tuba, “Ya ke kwenda na bayinsi?”

<sup>80</sup> Ntangu Satana nataka Yesu na zulu ya mongo samu na mpukumunu, yandi talisaka Yandi bimfumu nionso ya yinza. Ntangu yayi, yina vwandaka nyonso yina vwandaka mpe nyonso yina zolaka vwanda, bimfumu nyonso ya yinza. Mpe yandi tubaka, “Bayayi kele ya munu, mpe mu ke sala na bawu nyonso yina mu zola. Mu lenda sala bawu kunwana, mu lenda sala bawu kusala *yayi* to konso kima yina.” Mpe yandi lombaka bimfumu ya yinza, na yina beto lendaka mona wapi mutindu musoki mpe muyimi ke kota na politiki. Beno me mona? Beto lenda mona kuna kisika ya kele na kati ya dibuundu mpe na bantwadisi ya dibuundu, kisika musoki mpe muyimi ke kotaka na dibuundu.

<sup>81</sup> Ntangu yayi beno tala mbote mutindu mosi ya ntama yina ya mafuta yina bandaka na disamba ya Eden, yina tulaka kidimbu ya yimbi na zulu ya mosi, mpe Kidimbu ya kieleka na zulu ya yankaka, me kulumuka mbala mosi na bantangu ya Mfumu ya beto Yesu. Ntangu Yandi vwandaka awa na zulu ya ntoto, ba pesaka Yandi kumekama na yina ba bokilaka “ludedomo,” yinzo ya lusambusu ya ludedomo. Wapi mutindu ya kuseka ya yimbi yina vwandaka! Ya vwandaka ve na kima mosi yina ba lendaka mona samu na Yandi. Yina vwandaka lweka ya politiki. Ba lendaka ve kumona kima mosi ya yimbi samu na Yandi. Ata mpe ya kulutilla mingi mutindu Pilate, yandi mosi, tubaka, “Mu ke mona ata foti ve na Yandi.”

<sup>82</sup> Mpe na manima ba ke kwisa dibuundu. Ba ke pusa bawu na ngolo ntangu yayi samu na kubaka lukanu. Na manima yinza ya politiki me tula Yandi kimpwanza, samu na kuvukana na mpeve yina mosi yina vwandaka na kati ya dibuundu, yina vwandaka na politiki; samu na kutalisa ti kana Satana zimbisaka bitumba ya yandi awa, yandi vwandaka kaka na kima mosi samu na kubumba, yandi lendaka vutuka kaka na dibuundu. Mpe ba komaka Yandi na kulunsi, samu ba vwandaka tuma bawu na ngolo na kubaka lukanu. Mpe bawu tubaka, “Pesa beto

Barabbas na kisika ya Yesu.” Beno me mona yinki mutindu bawu salaka yawu?

Ya kele kieleka na ntwala ya meso ya beto bubu yayi, kima mutindu mosi, mpe ke vwanda mpe ntangu nyonso ke vwanda, ke pusa na kubaka lukanu!

<sup>83</sup> Ntangu yayi, ntangu ba tumaka na ngolo lukanu, Pilate zabaka na kati ya ntima ya yandi ti ntangu yandi yambulaka bawu na . . .yandi lendaka pesa Yesu na dibuundu, ti yandi zabaka ti dibuundu vwandaka mosi yina yekulaka Yandi ti ba koma na kulunsi; mpe kana yandi vutulaka Yandi na dibuundu, dibuundu ke koma Yandi na kulunsi. Na yawu, ba me katula ve Pilate! Yandi bakaka maza mpe mekaka na kusukula Menga ya Klisto na kusukulaka maboko ya yandi, kasi yandi lenda ve kusala yawu.

<sup>84</sup> Kubanda ntangu yina, awa na Suède, to na Suisse, mu zola tuba, kisika wapi Pilate kutanaka na bamvula ya yandi ya nsuka, zimbisaka mabanza ya yandi, yandi kumaka kilawu, yandi mosi kwendaka tii na lufwa na dibulu ya maza. Ya kele na disolo yina ke tuba, “Na ngunga ya tatu na manima ya midi, maza ya bleu ke basikaka na yisi ya kiziba yina.” Bantu ke vukanaka kuna na yinza ya muvimba samu na kutala yawu mbote. “Na ngunga ya tatu, masa yina ya bleu, ya indigo na kutala ke mataka katuka na yisi kisika mosi kuna, mpe ke ningisaka na zulu ya masa mpe ke kulumuka na yisi, samu na kulakisa ti ata maza lenda sukula Menga ya Yesu Klisto na kusukulaka maboko ya muntu nyonso.” Yandi zaba dyambu!

<sup>85</sup> Mpe muntu nyonso yina Klisto tulaka na maboko ya beno, ya kele na kima ve yina lenda sukula yawu kuna. Ya kele kaka na kima mosi ya kusala, kele kundima Yawu, kukwikila Yawu.

<sup>86</sup> Bana ya Satana, bana ya Caïn, ke na kutalisa mpasi bana ya Nzambi, ke tula bawu na lufwa. Ya kele yina bawu salaka na Abel. Ya kele yina bawu salaka na Yesu. Ya kele yina bawu salaka na baprofete. Ya kele yina kele na kati ya bawu na kusala dyaka, mpe bawu ke sala yawu ntangu kaka nzila ke zibuka samu na bawu na kusala yawu.

<sup>87</sup> Beno bambuka moyo, beto me monana mutindu ti beto me vukana mpe sakana, mpe basisaka bantu na nzila ya Nsangu ya mbote mpe ya disolo, ya yina ke salama. Mpe awa beto me kutana dyaka na yawu, kaka awa na yinsi ya beto, mpe ya kele ve na kima yina beto lenda sala samu na yawu. Kasi beno ke tuba kuna, “Mpangi Branham, yinki kele kikuma ya nge ya kuzonzila yimbi samu na yawu?” Dyaka ve ti mu lendaka kusukisa disumu; mu lendaka telemina yawu na ndinga ya munu. Mpe ya kele kieleka yina mu ke na kusalaka ntangu yayi na kuteleminaka disumu, mpe na kuteleminaka kima ya yimbi. Beto me sala yimbi, mpe beto ke buka yina beto kunaka, ya kieleka.

<sup>88</sup> Kubanda Middletown, ba vwandaka na kuwa. Yandi nataka nganga-Nzambi, mulongi ya Baptiste, mpe mulongi ya Presbytérien, kintwadi, yandi yufulaka mbongo ya lukolo yayi. Mpe nganga-Nzambi ndimaka ti ba-Protestant futaka bampaku mutindu mosi na bantu ya Katolika, mpe—mpe ba ke pesa mbongo na balweka nionso zole, mpe yandi tubaka, “Yina beto fwana sala kele kusala lukolo mosi, lukolo ya Katolika.” Oh, kieleka, beno baka bana yango ntangu bawu kele fyoti. Oh, oh, wapi kima!

<sup>89</sup> Mpe wapi mutindu bantu me vwanda kuna, mpe me kotisa kima yayi kaka samu na politiki! Wapi mutindu, mu ke bakula yawu ve. Kasi beto me kuma kisika yango, awa na suka yayi ya Paki. Mpe kima ya kieleka, kikuma ya kieleka beto me kuma na yinsi yayi, beto me kuma ba-American, vwandaka samu na kimpwanza ya nsambulu na kutelemina systeme yina ya Jezabel, mpe beto ke baluka kaka mpe ke sola yawu na estrade kuna na Yinzo ya Mpembe. Kima ya kieleka yina beto me katuka awa samu na kuzwa kimpwanza! Oh, ya kele—ya kele mutindu ya nene yina beto ke na kuzingila ntangu yayi, beno zaba yawu; dibuundu ya kimpeve, samu ti ya vwandaka me lemba.

<sup>90</sup> Bawu kufwaka Yandi, kufwaka Yandi kaka mutindu bawu salaka na Abel ya kukwikama. Samu na yinki Abel, kufwaka . . . ba kufwaka bawu? Samu ti na kati ya ntima ya yandi yandi vwandaka na luzayikisu ya kundima ya Nzambi na yina ya lombaka na kuvulusa muntu na disumu. Ya kele ya kieleka samu na yina bawu tulaka Yesu na lufwa, samu ti na kati ya Yandi vwandaka luzayikisu ya yina ya kuzwaka samu na Nzambi na kubelusa disumu. Ya kele kaka samu na yina bubu yayi ti bawu ke teleminaka Dibuundu ya kieleka ya Nzambi ya moyo, samu ti Yawu ke longaka nkisi samu na disumu, bima yina ke salaka bantu kuzinga mutindu yankaka, kusala ya kuswaswana.

<sup>91</sup> Mpe ntangu beno ke nata yawu mbala mosi na dibuundu yina beto ke na kuzinga bubu yayi, na kati ya bankonga ya beto ya ba-Pentecotiste, ba me vutuka mbala mosi, mpe kusala kima mutindu mosi yina bawu kuzwaka kimpwanza na kusalaka. Bawu zolaka lakisa ti ya kele na kima ke tambula mbote ve kisika mosi. Nkisi samu na disumu! Ya ke kwisaka na mutindu ya pete mingi, ya ke kota na malembe kaka mutindu, mbote, kaka mutindu ya kubumbama ya nsambulu ya kieleka ya Pentecote. Kasi kana ya ke basisa ve kima ya mutindu yina, kana ya ke basisa ve bima ya mutindu yina, ya kele na kima ke tambula mbote ve na yawu kisika mosi kuna.

<sup>92</sup> Wapi mutindu malala lendaka basisa ba-pasthèque? Ya lendaka ve kusala yawu. Wapi mutindu yinti ya vinu ke basisa ba-pêches? Ya ke sala yawu ve. Kana ya ke na kubasisa ba-pêche, ya kele na yinti ya vinu kele ve.

<sup>93</sup> Mpe ya kele yina beto zaba bubu yayi. Kana dibuundu, ata

mutindu ya ke tubaka ti yandi kele Dibuundu ya Nzambi ya moyo, kana ya ke basisa ve Nzambi na nzila ya mpulusu ya ntama, na kuvutulaka bantu na mpulusu ya kieleka ya Nzambi (mpe ya ke lakisa na kati-kati ya bawu, Nzambi ke zingaka na kati-kati ya bawu), na yina ya kele kima ya yimbi, ya kele—ya kele ve—ya kele ve Luzingu yina Klisto tubaka ti Yawu ke sala.

<sup>94</sup> Klisto kufwaka na Calvaire. Wapi mutindu Yandi kwendaka na kulunsi yina! Mu vwandaka tanga mwa buku mosi awa ntama mingi ve, yina na mwa kusosa-sosa, mpe na kati ya kusosa-sosa yayi mu me kuzwa kima mosi ke yitukisa mingi. Mu vwandaka, mpe mu tulaka buku, mpe mu telemisaka maboko ya munu mpe mu pesaka lukumu na Nzambi, mu mataka mpe mu tambulaka pene-pene ya mwa ntangu fioti, mpe kuvwanda mpe kutanga yawu dyaka. Mu banzaka, “Oh, ya kele mutindu yina, ti na zulu ya mongo mosi yayi kisika ba komaka Yesu na kulunsi, Adam kufwaka mpe ba zikaka yandi na zulu ya mongo mosi yina Yesu kufwaka, mpe ba zikaka yandi na mongo mosi kisika Adam kufwaka; yandi kufwaka na Golgotha, mpe ba zikaka yandi na Golgotha?” Mpe mu banzaka, “Yinki ya kele ya kulunga, kana ya vwandaka kieleka to luvunu.”

<sup>95</sup> Beto tuba ti ya vwandaka kieleka. Na yina, Adam ya ntete kufwaka mpe ba zikaka yandi, mpe kuna dyaka na fundu-fundu, samu yandi talisaka yinza mpe bantu, na disumu. Kasi Adam ya Zole, yina vwandaka Nzambi ya Mazulu, ntangu Yandi kufwaka na Golgotha, ya vwandaka ve na ntoto mingi samu na kusimba Yandi kuna, Yandi vumbukaka na kilumbu ya tatu mpe ke zinga mvula na mvula. Kasi diambu ya disumu sukaka!

<sup>96</sup> Nzambi sukisaka dyambu ya disumu kuna na Calvaire, ya kele kisika ba futaka mfuka. Ntangu Adam yayi, Adam ya Zole, kufwaka, Yandi futaka mfuka ya disumu samu na bantu.

Mpe yinza tulaka Yandi na kati ya ntoni, mpe tulaka Yandi kidimbu na ntoni yina.

<sup>97</sup> Mpe ba ke sala mutindu mosi bubu yayi. Ba ke meka na kusala mutindu mosi bubu yayi. Mu zola ve ti beno kondwa yayi. Yinza ke na kumeka, mpe ke kuma yimbi ntangu nyonso, samu na kutula dyaka Klisto na kati ya ntoni. Ba ke meka na kusala Yandi Nzambi ya masolo, Mosi yina tambulaka na bilumbu, mpe pesaka ngolo na bilandi samu na kubelusa bambevo, mpe kubasisa bampeve ya yimbi.

<sup>98</sup> Kasi yinki bawu salaka? Kaka na ntangu bawu banzaka ti bawu kwendaka ntama ya Yandi, kaka mutindu Caïn salaka ntangu yandi banzaka ti yandi basikaka na Abel, bawu tulaka Yandi kidimbu na ntoni, mpe tulaka Yandi na kati kuna.

<sup>99</sup> Mpe bubu yayi ba ke meka na kukanga Klisto na kati ya ntoni. Kasi, oh, yinki suka ya Paki salaka! Suka ya Paki me bebisa théologie ya bawu nionso. Mpe ntangu suka ya Paki kwisaka samu na bantu, Dibuundu awa, bamvula funda mosi

na bankama yivwa na manima, mpe yawu bebisaka théologie ya bawu. Yandi kele ya kufwa ve, Yandi kele moyo mvula na mvula! Bawu lenda ve kukanga Yandi na kati ya ntoni. Beno lenda tula Yandi na kati ya ntoni ya ba-Methodiste, to na ntoni ya ba-Baptiste, to na ntoni ya ba-Presbytérien, to nionso yina beno zola. Kasi Yandi—Yandi basikaka na ntoni yina, mpe kele moyo bubu yayi! Mu vwandaka na ntoni ya ba-Baptiste, mpe beno lendaka vwanda na ntoni ya ba-Methodiste, kasi kilumbu mosi Yesu vumbukaka kuna, kubanda Nzambi ya masolo, tii na Nzambi ya moyo, yina kele awa, ke zinga mvula na mvula.

<sup>100</sup> Kima mosi salamaka na suka yina ya Paki. Ya vwandaka Kidimbu, Kidimbu ya kiese. Ntangu ba bakaka Yandi mpe tulaka Yandi na ntoni, mpe tulaka kidimbu ya Rome na zulu ya yawu, kasi ntangu ngunga yina basikaka, ntangu ngunga yina kwizaka! Yandi bikanaka kuna mwa ntangu fioti, ya kele kieleka, Yandi bikanaka kuna bilumbu tatu yina mpe bampimpa tatu. Kasi na ntangu yina Masonuku tubaka, Alleluia, na ntangu yina ntangu Yandi tubaka, “Bebisa nzutu yayi, mpe na kilumbu ya tatu mu ke vumbula yawu”! Na yina ya kele ve na kima lenda kanga Masonuku yango, Ya fwana salama! Mpe kidimbu yina ba bukaka, mpe Yandi vumbukaka, Yesu mosi, ke zinga diaka mvula na mvula!

<sup>101</sup> Mpe bamvula funda mosi na bankama yivwa, to mu banza ti mu ke tuba bamvula kumi na yiya to kumi na tanu, mabuundu me tula Yandi kidimbu. Kasi Yandi tubaka, “Ya ke salama na bilumbu ya nsuka, Nzambi tubaka.” Ya kele ve na kima ke kanga yawu! “Ya ke vwanda na Nsemo na ntangu ya nkokila! Bisalu yina Mu ke sala, beno mpe ke sala yawu. Ya ke vwanda na Nsemo na ntangu ya nkokila!” Mu ke kipe ve bidimbu yikwa beno ke meka na kutula yawu, Nzambi ke buka konso kidimbu. Yandi bukaka kidimbu ya ntoni. Yandi bukaka kidimbu ya difelo. Yandi bukaka kidimbu ya lufwa. Yandi bukaka kidimbu ya ntoni, mpe vumbukaka samu na ntangu nionso, mpe nungaka na zulu ya ntoni, lufwa, difelo, maziame, mpe kima nionso yina me salama na bantu yina me vwandaka, samu na kutalisa ti Yandi vwandaka Nzambi mpe lendaka dyaka ve kuzwa kidimbu ntama na bantu. Nzambi, mvula na mvula! Kima ve lenda simba Yandi; ntoni lendaka ve kutimuka mudindu mingi, difelo lendaka ve kuvwanda ya tiya mingi. Oh, kima mosi ve lendaka ve kukanga Yandi! Yandi bukaka kidimbu nionso na Kidimbu yina ya nene ya Nowele, to, Kidimbu ya Nowele ve, kasi Kidimbu ya Paki yina ba tulaka Yandi kidimbu. Mpe Yandi tubaka, “Kidimbu mosi yina mu ke lwataka, beno ke lwata mpe, samu. . . Mpe Kidimbu yayi yina mu ke lwataka, ya ke sala bima mutindu mosi ntangu ba me tula beno kidimbu. Samu yandi yina ke kwikila na Munu, yandi mpe ke sala bisalu yina Mu ke sala; ya kulutila nene yayi yandi ke sala, samu Mu ke kwenda na Tata.”

<sup>102</sup> Wapi mutindu beno ke bumba Yawu? Yinki beno ke sala,

yinki bantu lenda sala samu na Yawu? Beno lenda . . . Ba me pusa beno na kubaka lukanu, samu na kubaka lukanu ya beno yina beno ke sala samu na yawu. Ya kele kaka kieleka.

<sup>103</sup> Ntangu yayi, beto ke mona ti Yandi . . . kidimbu mosi ve lendaka kanga Yandi, Yandi kwisaka. Nzambi bukaka kidimbu, kidimbu ya ntoni, bukaka kidimbu ya lufwa, bukaka kidimbu ya difelo, bukaka kidimbu ya ntoni, mpe basikaka na lunungu. Yinki yawu salaka? Kidimbu yina ya nene vwandaka na kati ya Yandi. Ba lendaka bebisa nzutu, kasi ba lendaka ata fioti ve kubebisa Kidimbu yina. Nzambi pesaka Dibuundu Kidimbu, na yina, yina ba lendaka bebisa ata fioti ve. Ntangu ba bebisaka Abel, Yandi telemisaka Seth. Ntangu bawu bebisaka profete mosi, kuna telamaka yankaka. Bawu landilaka na kubebisa. Kasi Nzambi pesaka bawu kima mosi, na yina, ti bawu lenda ve kubebisa. Ya kele Mpeve ya kulutula mazulu; Ya kele Mpeve-Santu Yawu mosi, mpe Yawu kele yina ke kubwaka ve mpe Yawu kele yina ke fwaka ve. Ba lenda bebisa yawu ve. Ya ke zinga, mpe kulandila, mpe kulandila. Mpe samu ti Yandi ke zinga, beto ke zinga na Yandi samu ti beto kele ya kutula kidimbu na kati ya Nzutu ya Mfumu Yesu Klisto. Ata nzila ve, ata mutindu ya kubeba ve, lenda kufwa ve, kasi kele na Luzingu ya Kukonda nsuka. Amen. Kupasuka ya nene ya bidimbu yayi na Nzambi.

<sup>104</sup> Yandi bukaka diaka kidimbu yankaka yina mu zola tubila awa, yandi monaka kuna na Exode. Kasi mu ke kuzwa ve ntangu ya kubaka Masonuku, kasi Yandi . . . Talaka yawu na Exode. Ntangu muntu sumukaka mpe kabwanaka yandi mosi na Mvwandulu ya Nzambi, mpe yandi kwisaka samu na kusambila Nzambi, ya vwandaka na vwale yina vwandaka ya kulelika na kati-kati ya kisika ya santu mpe kisika ya kulutula Santu na ya kulutula santu. Na kati ya kisika ya kulutula Santu na ya kulutula santu vwandaka Nkembo ya Shekinah. Ba vwandaka ve na muswa ya kukota Kuna. Ba vwandaka ve na muswa ya kutala Yawu. Mpe muntu mosi vwandaka kota kuna, ba zolaka pakula yandi mbala mosi na mvula, yandi vwandaka lwata mbote, menga na zulu ya yandi, menga na diboko ya yandi, menga na kati ya kinatinu, samu na kumwangisa Kiti ya Kyadi. Nkembo ya Shekinah vwandaka nene mingi tii yandi zimbisaka nkawa ya yandi na kati kuna mvula mosi, basika kukondwa (tala; bika) na kunataka nkawa ya yandi. Mpe ntangu yandi vutukaka, nkawa yango kwisaka ntete na luzingu, mpe basisaka matiti, mpe bafelele vwandaka bisika nionso, samu ti ya vwandaka ya kulala na Mvwandulu ya Nkembo ya Shekinah. Kasi ya vwandaka na vwale yina vwandaka ya kulelika na kati-kati ya Kuna, samu ti ya vwandaka na disumu na zulu ya bantu.

<sup>105</sup> Kasi, oh, mpangi-bakala, ntangu ba mwangisaka yawu kilumbu yina na Menga ya Yesu Klisto, Mpeve ya Nzambi me pasula kidimbu na zulu na yisi, mpe me vutula muntu. Yandi kangaka yandi kaka ve na Mvwandulu ya Nzambi, kasi Yandi

vutulaka yandi na Nkembo ya Shekinah, na Mvwandulu ya Nzambi; ti yandi, luzingu ya yandi ya kufwa . . .

<sup>106</sup> Yesu tubaka, “Kana bawu salaka yayi na Yinti ya vert, yinki bawu ke sala na ya kuyuma?” Mpe kana bawu salaka yawu na Yandi, na kuvwandaka Yinti ya mubisu na Luzingu, yinki ya ke vwanda na yinti ya ntama ya kufwa ya misiku yina ke na Luzingu ve, beno me mona, ntangu yayi ntangu nganzi ya Nzambi me tiamuka? Wapi mutindu yinti ya ntama ya kufwa ya misiku lendaka telemisa yawu, ntangu Yinti ya mubisu, yawu kufwaka Yinti ya mubisu, mpe fidisaka Yawu, na difelo? Nganzi ya Nzambi tyamukaka samu na kukondwa kutumama, ya disumu, fidisaka Yinti ya mubisu na difelo, yinki ya ke sala na yinti ya kuyuma ntangu ya ke bula yawu? “Kana muntu ya kusungama ke kuzwa mpulusu, wapi kisika musumuki mpe muntu ya yimbi ke monika?” Muntu yina ke manga Nzila, muntu yina zaba mbote, muntu yina me monisama na yandi, mpe yandi ke manga kaka na kutambula na Nzila ya Nzambi, yinki ke salama na muntu yina? Yinki ya ke vwanda?

Yinga, Yandi bukaka kidimbu yina ba bumbaka samu na beto na Nkembo ya Shekinah, samu ti disumu sukaka ntangu yayi.

<sup>107</sup> Mpe ntangu yayi kidimbu kele kidimbu ya kisalu me kumana. Mpe beto zaba ti kidimbu, mutindu beno ke tula kidimbu na wagon mosi, mbote, bawu tulaka kisalu nionso na kati ya yawu, mpe bumbaka bima nionso kuna, mpe na manima ba ke kanga yawu tii na kisika ya ke kwenda. Kidimbu nionso kele kisalu yina ba me manisa. Ntangu beno ke sonika mwa bitini, na yina ba me tula yawu kidimbu na nsuka. Ba me tula yawu kidimbu ata fioti ve tii kuna ya ke suka.

<sup>108</sup> Ntangu yayi, menga ya bankombo mpe bana ya bangombe, mpe nionso yina, lendaka katula disumu ve. Kasi ntangu yayi sukaka na Calvaire, yawu katulaka disumu. Ntangu yayi beno tala mbote.

<sup>109</sup> Na disamba ya Eden, samu na kukeba bantu na kuvutuka na Yinti yina, Nzambi tulaka Wanzio kuna mutindu kidimbu, na mbele ke balula banzila nionso, samu na kukeba Yinti yina. Mpe ntangu yandi salaka kisambu samu na yandi, mpe yandi kulumukaka . . . Ntangu yayi beno bambuka moyo, Nani vwandaka na Yinti yina? Nani vwandaka Yinti yina? Ya vwandaka Yesu.

<sup>110</sup> Yinti ya lufwa vwandaka mama ya beno, yandi nataka beno awa na luzingu ya kimuntu. Klisto kele Mbutukulu na nzila ya Luzingu ya Kimpeve. Nyonso yina ke zinga na nzila ya kento, ke kufwa; nyonso yina kele ya kubutama na Bakala, ke zinga. Nyonso yina ke kwizaka na nzila ya kento, kele ya kimuntu; nyonso ke katukaka na Bakala, kele ya Kimpeve. Muntu ve *awa*; Muntu Klisto Yesu!

<sup>111</sup> Mpe beno tala mbote Yinti, ya kukeba; ya lenda vutuka ve, samu ti ya kele ve na dikabu ya kulunga samu na kukatula disumu. Na yawu kuna ntangu bawu kwizaka samu na kusambila, Nkembo ya Shekinah vwandaka na manima ya vwale, ya kutula kidimbu ntama na bawu. Ba tulaka yawu kidimbu na bawu, na disamba ya Eden.

<sup>112</sup> Kasi ntangu Kilumbu ya Pantekote kwizaka, mpangi, ntangu Yesu kufwaka kuna na Calvaire mpe manisaka kisalu, Yandi tulaka ve kidimbu na muntu, Yandi kangaka muntu na kati na Yandi mosi. Mpe ntangu yayi ba me tula beto kidimbu, mpe ba me kanga beto na Ntwala ya Nkembo ya Shekinah. Ve kaka beto kele ya kutula kidimbu na kati, kasi beto kele ya kutula kidimbu na kati ya Seko. Amen! Oh, mu zola yawu, ya kukanga na kati ntangu yayi! Yina kele Kidimbu ya kieleka ya Paki, “Samu ti na nzila ya Mpeve mosi beto nyonso kele ya kutula kidimbu na kati ya Nzutu mosi.”

Beno ke tuba, “Mpeve-Santu kele Kidimbu?”

<sup>113</sup> Éphésiens 4:30 ke tuba, “Beno nyongisa ve Mpeve-Santu ya Nzambi na yina beno kutulamaka kidimbu tii kilumbu ya beno ya mpulusu.” Yina kele Kidimbu ya kieleka, ya kieleka ya Paki. Ya ke lakisa ti ba me futa disumu, samu na beno, mpe Nzambi me ndima beno, mpe beno kele ya kutula kidimbu na kati ya Klisto na nzila ya Mpeve-Santu. Disumu me suka. Kidimbu ya Kukonda nsuka me kumana.

<sup>114</sup> Ntangu yayi beto me vumbuka na lufwa bubu yayi. Samu na yinki beto lenda kuzwa ntangu ya mutindu yina na zulu ya bima ya Nzambi? Samu beto me vumbuka na lufwa. “Bayina Yandi zabaka ntete, Yandi bokilaka bawu; bayina Yandi bokilaka, Yandi nungisaka bawu; bayina Yandi nungisaka, Yandi me kembisa bawu.” Na yina beto me vumbuka na lufwa ntangu yayi. Beto me vumbuka na kati, na nganda ve. Oh! Beno me tala? Ya kutula kidimbu ve, mutindu *yayi*, kasi ya kukanga na kati. Oh, la la, kana dibuundu lendaka kaka kumona yawu! Beno me mona, ba me tulaka beto kidimbu ve, ba me tula beto kidimbu. Na bilumbu yina, ntangu disumu vwandaka—vwandaka busafu na ntwala ya Nzambi, mpe ya vwandaka ve na mbongo ya kukatula yawu, ba tulaka beto kidimbu na yawu. Ntangu yayi ntangu yawu pasukaka na bitini zole, mpe kidimbu yina bukanaka na nzila ya dikabu ya disumu yina beto salaka, ntangu yayi beto me botama na kati, mpe me tulama kidimbu na kati. Beto me vumbuka na lufwa. Beto me vumbuka na lufwa ntangu yayi, beto me vumbuka dezia na lufwa. Wapi mutindu beno me zaba? Biblia me tuba mutindu yina! Amen. Beto me vumbuka ntangu yayi na lufwa. Beto me vumbuka ntangu yayi na Yandi na mvumbukulu ya kimpeve. Yinki mpova yayi *me kindisama* zola kutuba? *Me kindisama* zola kutuba “mvumbukulu.” Ya kele kieleka. Beto me vumbuka yimeni, kaka na ntangu yayi, ya kuvwanda kintwadi na bisika ya Mazulu na kati ya Klisto Yesu, ke sepela na Kidimbu



ya Paki. Amen. Yina kele Kidimbu ya kieleka ya Paki. Wapi mutindu beto kele? Na nzila ya Mpeve mosi ya kubotama na kati ya Nzutu, mpe ya Kukanga ya Seko. Beto me vumbuka ntangu yayi, na kimpeve. Wapi beto me vumbuka? Na luzingu ya disumu, beto vwandaka mbala mosi misumuki mpe zolaka bima ya yinza.

<sup>115</sup> Ntangu yayi, ya kele na bantu mingi ke tubaka ti ba me sansa bawu, kasi luzingu ya bawu ke siamisa mutindu yankaka. Luzingu ya beno ke siamisa yina beno kele. “Na nzila ya bambuma ya bawu beno ke zaba bawu,” Yesu tubaka. Ya kele samu na yina beto lenda ata mbala mosi ve kukwenda na zulu ya kusala muntu kuzonza na bandinga mpe kutuba ti yandi kele na Mpeve-Santu. Beto ke kwikilaka yawu ve. Ya kele ve na Masonuku samu na yawu. Ve, tata. Bantu ke zonzaka na bandinga mpe ke kwenda na ntwala mpe ke zinga mutindu yinza. Mpe bakento ke tubaka na bandinga mpe ke zenga bansuki ya bawu, ke lwata maquillage. Huh! Beno lendaka tuba ve ti yina vwandaka Mpeve-Santu. Kieleka ve, kieleka ve, kieleka ve. Bakala mosi ke kunwa fumu, mpe ke basika awa mpe ke zinga na kento ya bakala yina ke landa, ke tambula bisika nionso, ke tambula, ke tuba ti ya kele Mpeve-Santu? Ve, ve. “Na nzila ya bambuma ya bawu beno ke zaba bawu. Yinti ya kubeba lenda basisa ve bambuma ya mbote, to yinti ya mbote ke basisa bambuma ya kubeba.”

<sup>116</sup> Beto kele ya kutula kidimbu na nzila ya Mpeve-Santu, Kidimbu ya kieleka ya Paki ya Nzambi. Beto kele ya kutula kidimbu na kati ya Nzutu ya Klisto, ya kukangama ya Seko. Kidimbu ve samu na ntangu; kasi samu na Seko. Mpe ntangu yayi muntu yina kuzwaka yawu, me vumbuka na lufwa, na luzingu ya disumu. Yinki ya kele? Ba me telemisa Mpeve ya yandi, balukanu ya yandi—ya yandi me vumbuka, luzingu ya yandi me vumbuka, yandi kele kivangu ya malu-malu. Mpe yandi ke vukana kintwadi na bisi-ntoto, mutindu beto kele na suka yayi, samu na kusambila samu na mosi na yankaka, mpe samu na kusadisa mosi na yankaka, samu na kupesa kikesa mosi na yankaka, mpe samu na kuvwanda mpe kuvukana na bisika ya Mazulu na kati ya Klisto Yesu, ya kukanga na nzila ya Mpeve-Santu. “Samu ti beno kele ya kufwa, mpe luzingu ya beno kele ya kubumbama na kati ya Klisto, na nzila ya Nzambi, ya kutula kidimbu na nzila ya Mpeve-Santu,” Masonuku ke tuba. Ya kele Masonuku. Ntangu yayi beno me mona beto kele ya kutula kidimbu na nzila ya Kidimbu ya Paki. Kidimbu ya Paki ya mvumbukulu, yina siamisaka ti luzingu ya Yandi mpe yina Yandi tubaka vwandaka kieleka. Ntangu yayi beto ke mona ti ya kele kisalu ya kulunga, ya kele mbuma yina me suka. Mvumbukulu ya Nzambi kele mbuma yina me mana. Mpeve-Santu kele Kidimbu ya Nzambi ya kima yina me mana.

<sup>117</sup> Ntangu yayi beto me kwisa na Klisto. Kima ya ntete beto ke sala, beto me nungisama na nzila ya kukwikila na Yandi.

Ntangu beto ke sala yawu, na yina beto ke bakula ti beto me sala yimbi, beto ke lomba Nzambi na kusantisa beto, ya kele kuvedisa beto na luzingu ya beto ya disumu. Martin Luther, kunungisama, nsangu ya yandi. Na manima me kwiza Wesley, na kusantisama. Mpe na yina ntangu nionso me mana, mpe Dibuundu ya Yandi me manisa, yinki kele kima yina ke landa? Kisalu me kumana. Kisalu me manisa kele Kidimbu, ti Dibuundu me manisa.

<sup>118</sup> Mutindu na kati ya pyramide. Beno tala na zulu ya dollar mosi. Mu me tubila yayi. Mu zaba ve kana mu salaka awa na tabernacle, to ve. Beno tala na zulu ya dollar mosi, ba me bokila yawu “kidimbu ya nene.” Ntangu yayi wapi mutindu beno lendaka tuba ti Etats-Unis lendaka zaba yawu kuna na Egypte bawu kele na kidimbu ya nene, mpe beno tala kidimbu ya Etats-Unis na lweka yankaka, ngononi? Samu na yinki ba ke pusa bawu na ngolo na kusala ti kidimbu ya nene, kidimbu ya nene? Samu ti, kana beno tala, kaka na manima, na zulu ya pyramide ya kele na mwa ditadi ya fioti, mpe mwa ditadi yina kele ditadi ya yintu, mpe ba tulaka ditadi yina ya yintu na zulu ya pyramide ata fioti ve. Ya kele nsongi, kana beno me vwandaka ntete kuna. Na lemvo ya Nzambi, mu ke na yawu. Na yawu ya kele ve—ya kele ve na zulu na zulu ya pyramide. Yinki ya kele? Enoch tungaka yawu ntete kifuluka ya maza. Ya vwandaka lubambuku, ya kele samu na yina ya bebisaka ata mbala mosi ve na ntangu ya kifuluka ya maza. Ya kele ve na kima ke bebisaka yawu, samu ti ya kele lubambuku.

<sup>119</sup> Ntangu yayi kana beno ke bakula, kuna na nsi ya kele nene, mpe na manima ya ke yilama fioti kulutula na kati ya fioti, mpe na manima fioti kulutula, mpe na manima ya ke kwenda na ditadi ya yintu. Ya kele nsungi ya Luther, kunungisama na kati ya Dibuundu; kusantisama; na manima mbotika ya Mpeve-Santu. Kasi mutindu yawu ke tandama na zulu, yawu ke landila nsungi ya Luther, tii na nsungi ya Wesley, na nsungi ya Pentecote. Kasi na manima yawu bikaka nsungi ya Pentecote, it ke landila na kuyilama tii kuna ya ke kuma na kisika mosi ti matadi nionso ke kuma nsongi mingi ti lutebo . . .

<sup>120</sup> Ba ke na ba-tonne na ba-tonne ya bakilo, kuna na zulu. Wapi mutindu ya kumaka kuna, yina kele kaka dinsweki samu na muntu. Kasi ba ke bakaka lutebo yayi, mpe bawu lendaka lutisa yawu kuna, mpe ya kele na nsongi mingi na mutindu ya kulunga ti beno lenda ve kulutisa lutebo kisika poto-poto lendaka vwanda. Ya kele mutindu ya kulunga ba ke vukisa matadi kintwadi. Mpe ntangu yayi ntangu ditadi yayi ya yintu, yina matadi ke vukana mutindu *yayi*, mutindu ya kimvuka mosi, na mutindu ya ba-angle samu ti ditadi ya yintu ke kota na kisika mosi, mpe ke vwanda na kati ya yawu. Ya ke vwanda ve na nsatu ya poto-poto, ya ke vwanda ya kulunga.

<sup>121</sup> Ntangu yayi ya kele yina Nzambi ke na kusalaka na Dibuundu ya Yandi. Yandi ke vedisa bantu, mpe ke sala yawu na

mutindu ya kulunga, ti ntangu Ditadi ya yintu, Klisto, ke kwisa, ya ke lunga kintwadi na kivinga, mpe na manima mvumbukulu ya kima ya muvimba, Dibuundu me mata. Ditadi ya yintu!

<sup>122</sup> Ntangu yayi beto kele ya kuvwanda kintwadi na bisika ya Mazulu na kati ya Klisto Yesu. Ntangu yayi beto me bakula ti Yesu, nzutu ya Yesu, ba zangulaka yandi na mvumbukulu. Ntangu yayi beto zaba ti Biblia ke zonzila na mazulu tatu. Beto zaba yawu, mazulu ya ntete, mazulu ya zole, mpe zulu ya tatu. Mu ke kwikila ti ya vwandaka Paul yina ba zangulaka na mazulu ya tatu mpe monaka bima yina vwandaka ve ya kulunga samu na yandi na kuzonzila bawu. Ntangu yayi mazulu ya ntete ba me bokila, na kati ya Masonuku, mutindu matuti; na nzonzolo yankaka, kuna na yisi, awa na zulu ya kidimbu ya ntoto. Ntangu yayi ntangu Atimosifere yina me katuka na zulu ya matuti me kuma na kati ya Dibuundu, yina kele kisika ya Mazulu. Na yina ba ke talaka mazulu ya zole systeme solaire. Mpe mazulu ya tatu ke kwenda na zulu ya yawu.

<sup>123</sup> Ntangu yayi beto ke banza kaka, beno tala kaka yayi minuti mosi. Ntangu yayi, Einstein siamisaka, na nzila ya science, ti kana kima zole vwandaka kwiza mosi na yankaka, mutindu matoma zole ke sabuka nzila, mpe kana bawu vwandaka kwisa na mbangu ya mingi (ntangu yayi ya kieleka bawu fwana kwenda mbangu, mutindu makiasa ya bakilometele na sekonde mosi) kasi bawu lendaka kuluta kaka kuna mosi na yankaka mpe kuyangisa ata kima mosi ve. Mbangu lendaka kusala yawu, kuluta bawu na kati kuna mosi na yankaka kukondwa kuyangisa kima mosi ve.

<sup>124</sup> Ntangu yayi, ntangu yayi kana beno tala, mu vwandaka ya kutelama awa ntama mingi ve na Mongo ya Palomar, na Californie, mpe mu vwandaka tala kuna telescope yina lendaka kumona nkama mosi na makumi zole ya mafuku ya bamvula na mpiasika ya nsemo. Ntangu yayi beno banza, nkama mosi na makumi zole ya mafuku ya bamvula ya nsemo, ba-kilometre yikwa ya ke panzana. Beno me mona?

<sup>125</sup> Kasi dyaka Mazulu kele na makiasa na makiasa na makiasa ya—ya bamvula ya nsemo na zulu ya yina, tii ba ke banza na yawu dyaka ve. Wapi mutindu beno ke kuma Kuna? Ya kele nzietolo, ya ke vwanda mutindu mabanza, kele ntama mingi, ya ke vwanda mbangu mingi. Kana beno lenda banza na Mazulu, ya kele mutindu ya nswalu beno ke vwanda kuna. Yesu, na manima Yandi me vumbuka na lufwa, me luta na bibaka, kaka na kati ya myelo, mpe me telama, mpe kudia mbisi ya kutokisa, mpe kinkuku ya mafuta ya niosi. Alleluia. Mbangu! Ntama mingi ve na luzingu me basika na nzutu yayi, beto kele na Mvwandulu ya Nzambi, kuna. Beto zaba kaka mutindu ba-pied na ba-puce, mpe ba-yard na ba-mile, mpe nyonso yina, beto kele na kati ya ssysteme ya ntoto. Kasi ntangu beto ke katuka awa, mpangi-bakala, oh, la la, wapi ntangu!

<sup>126</sup> Na kuzonzaka nkokila yankaka yina, Abraham mpe Nkuna ya yandi na manima ya yandi, mutindu Nzambi talisaka na nzila ya Abraham. Mutindu Yandi nungisaka Abraham, kapu ya 12 ya Genèse. Mpe na . . . yayi landilaka, kapu ya 16, mutindu Yandi siamisaka ngwisani na nzila ya kusantisama. Na kapu ya 17, bika ti yandi kunwa dibebe na ntulu ya Yandi, yandi kota na kati ya Mpeve-Santu. Mpe na yina Yandi siamisaka, to ba tulaka yandi (mutindu beno kuwaka munu kulonga dilongi ya *Beno Kuwa Yandi*), basisaka Abraham mpe sobaka nkumbu ya yandi katuka na Abram tii na Abraham, pesaka yandi kitini ya Nkumbu ya Yandi, Elohim, h-a-m. Na yina beto ke mona ti, na manima ya yina, Yandi monikaka na Abraham.

<sup>127</sup> Ntangu yayi na Nkuna ya yandi, beno tala mbote mutindu Yandi salaka Nkuna mutindu mosi. Nkuna ya Abraham lutaka na kunungisama, kusantisama, mbotika ya Mpeve-Santu; kumonisama ya Nkumbu ya Yandi, kumonisama ya Nani Yandi kele (luzayikisu yina ya Nani? Yesu Klisto), mbotika na Nkumbu ya Yandi, mpe nyonso yankaka mutindu yina, luzayikisu yina, na kukabulaka Nkumbu ya Yandi na Dibuundu ya Yandi, bokilaka bawu na kubasika. Na yina yinki Yandi salaka? Na Dibuundu mosi yina Yandi bokilaka Nkumbu ya Yandi, Nkumbu ya Yesu, yinki Yandi salaka? Yandi monikaka na mutindu mosi yina Yandi salaka na Abraham, na kuvwandaka na lenda ya kumona mpeve na manima ya Yandi. Beno me mona? Yandi monikaka na Nkumbu mosi yango, na kima mosi yina, na mutindu mosi! Beto kele kaka na nsuka ya nzila.

<sup>128</sup> Ntangu yayi beno tala yina salamaka. Ntangu Yandi salaka yawu, yina vwandaka kidimbu ya nsuka yina Yandi pesaka Dibuundu na ntuala ya nsobolo kukwisa na Dibuundu, na Abraham mpe Sarah. Ntangu yayi ntangu Wanzio tubaka dinsweki, kento (Dibuundu, yina vwandaka monikisa), na mpasi yandi lendaka kwikila yawu, yandi sekaka kaka na kati ya yandi mosi. Beno me mona, yandi vwandaka na bamvula nkama mosi, ya kondwaka kuvwanda na yandi mpe Abraham mutindu bakala mpe kento. Beno me bakula yina mu zola kutuba, kimpangi ya dibuta, mu banza bamvula makumi zole na ntuala; mbote, bawu kufwaka na nsalulu yina. Sarah; Abraham mutindu ya kufwa, kivumu ya Sarah mutindu ya kufwa. Kasi yinki salamaka? Yinki salamaka? Yandi tubaka, “Wapi mutindu mu lendaka, na kuvwandaka kiboba mutindu mu kele, mpe mfumu ya munu, beto kele ve. . . me sukisa nzila yina, beto me sukisa mutindu yina bamvula mingi, mingi. Ya lenda salama ve samu na yandi. Ya lenda salama ve samu na munu. Wapi mutindu mu lenda sala yawu?” Mpe yandi sekaka na kati ya yandi mosi.

<sup>129</sup> Mpe Wanzio tubaka, “Samu na yinki yandi me seka? Samu na yinki yandi me banza na kati ya ntima ya yandi? Samu na yinki yandi me tuba yayi?” Ntangu yayi beno tala mbote, yina vwandaka kidimbu ya nsuka ntete kima kusalama na Sarah mpe

Abraham.

<sup>130</sup> Ntangu yayi mu longaka awa kilumbu mosi, mpe tubaka na beno ti Nzambi vutulaka bawu na ntwenya ya bakala mpe ya kento. Samu na kusiamisa yawu, yandi kulumukaka, ba salaka mwa nzyetolo mpe kwendaka na—na Gerar, mpe Abimélec, ntinu yina ya ba-Philistin, kubwaka na zola na Sarah, mpe zolaka kukwela yandi. Samu ti, yandi vwandaka ntwenya ya kento dyaka, kitoko. Mpe beno tala, Yandi zolaka sala kima, Yandi zolaka soba yandi. Yandi vutulaka kaka yandi ve na ntwenya ya bakala mpe ya kento, yandi mpe ya yandi, Yandi salaka yawu ve; samu ti, kana bawu zolaka, kima mutindu mosi zolaka zinga. Beno me mona, bawu zolaka kwiza kaka . . . samu ti yandi kwelaka yandi ntangu yandi vwandaka pene ya kumi na sambanu, mpe yandi vwandaka kaka ntwenya ya bakala, mpe bawu zingaka luzingu ya bawu nionso na bana ve. Kana Yandi zolaka kaka kuvutula bawu, mbote, bawu zolaka kaka kusala kima mutindu mosi dyaka. Kasi Yandi zolaka sala kima ya kuswaswana, Yandi zolaka soba bawu samu ti bawu kuzwa mwana yayi ya nsilulu, mwana ya nsilulu bawu zolaka kuzwa. Kasi Yandi zolaka soba systeme ya bawu nionso, mpe kuvutula bawu bantwenia *mpe* kusoba bawu, samu na kuzwa mwana.

<sup>131</sup> Kima mutindu mosi Yandi ke sala na ntuala! Na manima ya yina, mpe beno bambuka moyo, na manima kidimbu yina monisamaka ya muvimba na Abraham mpe kimvuka ya yandi, na manima kima ya kulanda kwisaka vwandaka nsobolo yina. Beno me mona? Ntangu yayi beto me mona nyonso na nzila ya kunungisama, kusantisama, mbotika ya Mpeve-Santu, kutulama ya mwana, mpe bidimbu mpe mambu ya ngitukulu ya Yandi, na kuvwandaka na Mvwandulu ya Yandi samu na kuswasikisa mabanza ya ntima, mpe nionso yina, mutindu Yandi tubaka, “Mutindu ya vwandaka na bilumbu ya Sodome, mutindu mosi ya ke vwanda na kwizulu ya Mwana ya muntu.” Beto ke mona yawu kusalama kaka ntangu yayi! Yinki vwandaka kima yina vwandaka landa? Nsobolo ya nzutu. Ntangu yayi, beno lakisa ti yayi beto ke na kuingila, Mwana yina ba me vingila. Nkembo! Ya kele kieleka? Beto lenda ve kukutana na Yandi na bantzutu yayi. Kana beto me soba na bantwenya ya babakala mpe bakento, kasi beto lenda ve kukutana na Yandi, samu ti beto fwana kutana na Yandi na mipepe. Ya fwana vwanda na kima me salama na nganda ya kusoba beto diaka bantwenya ya babakala mpe bakento, beto fwana soba mpe beto fwana zanguka na zulu samu na kukutana na Yandi. Mpe kima yankaka ke kwisa kele Enlevement ya Dibuundu, mpe nsobolo ya nzutu ya basantu yina kele ya kulala, samu na kukutana na Mfumu Yesu na zulu.

<sup>132</sup> Oh, lubambuku ya Paki, bayina ba me tula kidimbu na nzila ya Mpeve-Santu! Ntangu yayi na mwelo ya Eden, muntu vwandaka ya kutula kidimbu na Nzambi, na Pentecote yandi vwandaka ya Seko ya kukanga na kati ya Nzambi. Yandi ke kota

to ke basika dyaka ve, yandi kele Kuna samu na mbote! Beno tala! Mpeve mosi, “Beto me botama na kati ya Nzutu mosi, na nzila ya Mpeve-Santu.” Ya kele kieleka? Na yina ba me tula beto kidimbu tii wapi ntangu? Tii kilumbu ya mpulusu ya beno! Yandi ke basika diaka ve samu na bima ya yinza. “Samu ti beno kele ya kufwa, mpe luzingu ya beno kele ya kubumbama na kati ya Nzambi na nzila ya Klisto, ya kutula kidimbu na nzila ya Mpeve-Santu.” Oh, wapi Disonuku ya kitoko, ya kukangama kati na Klisto na nzila ya Mpeve-Santu!

<sup>133</sup> Na yina ntangu Yesu vumbukaka na lufwa, ba tumaka diaka bantu na kubaka lukanu ya bawu, “Yandi telemaka, to Yandi telemaka ve?” Mpe yinki bawu salaka? Bawu salaka kima mutindu mosi bawu salaka na kumekama yina, politiki mpe dibuundu kintwadi; samu na politiki mpe misambidi kuvukanaka mutindu mosi bawu salaka kuna.

<sup>134</sup> Kaka mutindu bawu ke sala na bilumbu ke kwisa, mpe ke sala yawu malu-malu yayi, politiki mpe nsambulu! Achab vwandaka muntu mosi ya mbote, kasi Jézabel, yandi kwelanaka na yandi. Mu ke tuba ve ti Ntwadisi ya yinsi Kennedy kele ve muntu ya mbote, kasi yandi me kwelana na systeme yina ya Jezabel. Ya vwandaka ve Achab yina salaka yawu, ya vwandaka Jézabel na manima ya kiti ya kimfumu, yina vwandaka twadisa yawu. Ya kele systeme yina ya Jezabel ke sala kubeba awa. Yandi fwana sala, samu yandi me kwelana na yandi. Yandi fwana kuzwa yawu, yandi fwana sala yawu, yandi me kwelana na yandi. Oh, la la! Bantu, beno lenda mona ve yina Masonuku ke na kusala? Beno lenda mona ve kisika beto kele ya kutelama awa na bilumbu ya nsuka?

<sup>135</sup> Ntangu yayi beno tala muntu na manima ya mvumbukulu. Beno me mona kumekama yina, me balula yawu na dibuundu, na kuzabaka yina dibuundu ke sala. Mpe yinki yawu salamaka ntangu basoda yayi vwandaka na boma mpe kimaka? Dibundu bakaka luyalu na basoda yayi, mpe ba pesaka bawu mbongo, na kukwenda tuba ti “Bilandi ya Yandi kwizaka na mpimpa mpe nataka Yandi.”

<sup>136</sup> Na yina mu zola kuyufula beno. Kana bilandi kwizaka na mpimpa mpe nataka Yandi, samu na yinki bawu bakaka ve robe yina vwandaka na zulu ya Yandi? Kana bawu vwandaka miyibi, mpe kuyiba, samu na yinki bawu bakaka ve robe, mpe? Kasi kitende vwandaka ya kutulula kaka kuna, na serviette na zulu ya kizizi ya Yandi, kitende vwandaka ya kutanda kisika ya vwandaka na zulu ya nzutu ya Yandi. Yandi lutaka kaka na yawu nyonso, mpe kwendaka na mvumbukulu. Kima mosi ve vwandaka kwamisa; kaka mutindu ba tandaka Yandi, Yandi vwandaka ya kulala mutindu mosi, kasi Yandi basikaka na lino. Amen.

<sup>137</sup> Beno me mona, kasi kumekama diaka, kufunda ya luvunu.

Samu na yinki? Ba tumaka bawu na ngolo, ba vwandaka pusa bawu na kubaka lukanu. Muntu zolaka baka lukanu. Dibuundu zolaka kutuba, “Yandi me vumbuka na lufwa,” to, “Yandi me vumbuka ve na lufwa.” Amen.

<sup>138</sup> Oh, ti beto kuzwa kuwa ya beto ntangu yayi, beno tula kuwa ya beno ya kimpeve. Beno tala, ya me kuma kima mosi yina. Bantu ke meka na kulanda, mutindu balukutakanu ya beto, mpe kutuba. . . Mu me kuwaka mabuundu, Dibuundu ya Klisto, yina ba me bokila, yandi tubaka, “Mu ke pesa mafunda ya ba-dollar samu na muntu nyonso yina lenda lakisa kimbangi mosi ya n- . . . to muntu yina belukaka.” Mu bakaka badokotolo na bawu, mpe bawu zolaka kwikila yawu ve. Samu na yinki? Ba me pusa bawu na ngolo na kubaka lukanu. Ba me tula bawu kidimbu na nganda, na Cain, na bisambu ya nsambulu. Mwa Dibuundu ya kieleka ya Nzambi keke na kati ya bantu fioti, kasi yandi ke tambula kaka mutindu yina, kasi yandi ke . . . Wapi mutindu Yandi bikaka nkama kumi na tanu ya bansungi ya mudidi?

<sup>139</sup> Bawu ke tuba, “Dibuundu ya Rome!” Kieleka, dibuundu ya Rome vwandaka dibuundu ya ntete ya pentecote, dibuundu ya Katolika vwandaka. Yawu bandaka na Pentecote, kasi na manima yawu zolaka kubongisa.

<sup>140</sup> Mpe kana dibuundu yayi ya ba-Pentecotiste lendaka telama bamvula mafunda zole yankaka, ba ke vwanda yimbi mingi kulutika Katolika keke ntangu yayi. Ba ke na kukumaka ntama mingi na nyonso! Ba yufulaka munu kilumbu yankaka yina, “Nge ke longa kana nge kwisa na kisika yayi, bakento yina me lwata maquillage, bawu zolaka lwata ve bakupe, zolaka lwata ve bima yayi?”

Mu tubaka, “Beni yufula munu ve kuna. Ve, tata. Beni yufula munu ve na kukwisa.”

“Nge ke longa yawu?” Bawu tubaka mpe, “Yinki keke kisalu ya nge?”

Mu tubaka, “Ya keke kisalu ya Mfumu, mpe mu ke landilaka bisalu ya Yandi.” Ya keke kaka kieleka. Kieleka! Na yawu mu tubaka kaka . . .

“Samu na yinki beno ke sala yawu? Ya keke ve bima yankaka ya kutuba?”

Mu tubaka, “Yinga, kasi bika bawu sala yawu, mpe na manima beto ke zonzila bima yankaka, beno me mona. Beni me mona? Beni me mona, beto—beto baka lufulu.”

<sup>141</sup> Yawu yina diambu. Beni ke meka na kudumuka na zulu ya kimatinu, ntangu beni fwana vwanda dyaka na yisi. Beni me mona? Beni banda *awa*, beni kukivedisa mpe beni banda mbote, mpe na manima beto lendaka kutunga na zulu ya yawu. Na nzonzolo yankaka, beni lenda tunga ve, samu ti lufulu yina ba tungaka ve na zulu ya misiku ya Klisto ke kubwa. Mpe

Biblia, Yawu ke tuba, “Ya kele busafu samu na kento na kulwata bilele ya bakala.” Ya me sobaka ata fioti ve kubanda Nzambi me sobaka ve. Yandi kele ya Seko, mpe mabanza ya Yandi mazono kele mutindu mosi na bawu kele bubu yayi, mpe ke vwanda kukonda nsuka. Mpeve ya Yandi kele mutindu mosi mazono, bubu yayi, mpe kukonda nsuka. Bisalu ya Yandi kele mutindu mosi mazono, bubu yayi, mpe kukonda nsuka. Mpulusu ya Yandi kele mutindu mosi mazono, bubu yayi, mpe kukonda nsuka. Mpe Yandi kele mutindu mosi mazono, bubu yayi, mpe kukonda nsuka. Ya kele ve na mutindu ya kubaluka na yawu. Ntangu yayi kidimbu ya kutambula kele kudya yawu. Beto zaba yawu. Ya kele kieleka? Nzambi tubaka ti ya vwandaka yawu.

<sup>142</sup> Ba tumaka Muntu na ngolo na kubaka lukanu. Yinki ba vwandaka tuma bawu ntete na bilumbu ya Klisto? Yinki ba vwandaka tuma bawu na kusala? Ba vwandaka tuma bawu na ngolo, ntete, samu na kundima Yandi. Yandi lakisaka bawu kidimbu ya Yandi, Kidimbu ya Yandi, Yandi vwandaka Mesiya! Wapi mutindu Yandi talisaka yawu? Kaka kieleka yina Biblia tubaka ti Yandi ke sala. Yandi vwandaka Profete, mpe Yandi swasikisaka mabanza na mabanza ya bawu. Mpe bawu tubaka, “Yandi kele diabulu, Béelzébul.” Ba tumaka bawu na ngolo na kubaka lukanu. Ba lendaka diaka ve kukanga yawu.

<sup>143</sup> Mpe dyaka dibuundu ya Pantekote, to ya ba-Baptiste, to ya ba-Presbytérien! Mpeve-Santu kele. . . Klisto me kuzwa bansangu, mpe Yandi kele na kati ya Dibuundu. Mpe bawu ke tuba, “Muntu yayi ke botikaka na Nkumbu ya Yesu. Yandi ke kwikila ti beno fwana ve kuzonza na bandinga samu na Mpeve-Santu, mpe bima ya mutindu yina, ti ya kele ve kimbangi ya ntete. Yandi ke kwikilaka na bakento, bakento ya beto nyonso ke lwataka nsuki ya bawu mutindu yina. Mu banza ti ya kele ve na kima ya kusala na yawu.” Na yina samu na yinki Nzambi ke siamisa ti Yayi kele Kieleka? Beno tala kisika wapi ya kele.

Bawu mangaka Bunzambi ya Yandi ntangu Yandi talisaka bawu ti Yandi vwandaka Mesiya. Ba vwandaka tuma bawu na ngolo na kutuba kima mosi.

<sup>144</sup> Mpe mutindu mosi bawu kele bubu yayi, ke manga Yawu, mpe ke simbisa Yawu ve, mpe ke sukula maboko ya bawu na Yawu. Ba me tuma bawu na ngolo na kubaka lukanu. Ya kele ve na nzila ya kati-kati! Beto me kuma na ntangu ya nsuka. Ba me tuma muntu na kundima Yawu to kumanga Yawu. Beno fwana ndima Yawu to kumanga Yawu. Ba me tuma yawu na zulu ya Amerique. Ba me tuma yawu na ngolo na zulu ya Branham Tabernacle. Ba me tuma yawu na ngolo na ba-Pentecotiste, na ba-Methodiste. Ba me tuma yawu bisika nionso. Beno fwana ndima Yawu to beno bika Yawu. Nzambi me siamisa Ndinga ya Yandi, na kulakisaka bidimbu ya Yandi, na kuvutulaka ministere ya Yandi, na kulakisaka kieleka yina Yandi kele, na kusiamisaka ti Yandi kele Nzambi. Yesu tubaka, “Kana Mu ke sala ve bisalu



ya Tata ya Munu, na yina beno kwikila Munu ve.” Ya kele kieleka. “Kasi kana mu sala bisalu ya Tata, na yina beno ke kwikila bisalu.” Beno bawu yayi. Beno me mona, bawu lenda ve, bawu—bawu—bawu—bawu lenda ve kuzwa kima mosi na Yawu, samu ti Ya kele kieleka. Na yina samu na yinki bawu ke ndima Yawu ve? Ya kele samu na denomination. Ba lenda ve kundima Yawu, na yina ba me tuma bawu na ngolo ntangu yayi samu na kusala kumekama ya ngolo.

<sup>145</sup> Mpe na Ohio kaka mwa bilumbu fyoti me luta, mabuundu mosi yina simbisaka munu mvula mosi me luta; samu ti mu teleminaka yawu, mpe lakisaka ti ya vwandaka luvunu, ya vwandaka ve na mosi ya bawu, kasi dibuundu mosi, Mpangi Sullivan, yina zolaka vukana. Mu tubaka, “Mu kele dyaka na diboko mosi, mu kele dyaka na makulu mutindu mosi, Mu kele dyaka na Nsangu mosi, mu kele dyaka Mpangi Branham. Yinki kele dyambu na munu?” Ya kele munu ve. Mpeve-Santu ke na kuzonzaka dyaka, Mpeve-Santu ke salaka dyaka bisalu mosi, Yandi ke lakisa dyaka yawu. Kasi ba me tuma beno na ngolo! Ya kieleka, ba me tuma bawu na ngolo. Mpe Mpeve-Santu ya nene ke kulumuka na kati-kati ya bawu, mpe ke zonza Bandinga mpe ke tuba bima yina Yandi tubaka kuna. Na yina dyaka bawu . . .

<sup>146</sup> Beno tala awa na Californie kilumbu yankaka yina. Mu banza ti mu lenda mona yawu awa; yawu yayi. Mu vwandaka na Cafeteria Clifton, na madia ya suka. Mpe kuna mpangi-bakala mosi ya Baptiste . . . na manima mu manisaka kaka na kupanza mabuundu, na kutubaka na bawu mutindu bawu vwandaka sala yimbi, mpe bima yina bawu vwandaka sala, na kumangaka Nzambi. Mpangi-bakala yayi ya Baptiste kwisaka awa samu na kutula maboko ya yandi na zulu ya munu, samu na kusambila. Mpe, ntangu yandi salaka yawu, yandi bandaka na kuzonza mutindu na bandinga. Ntangu yandi . . . Ntangu yayi, yandi vwandaka Baptiste, zabaka kima mosi ve samu na yawu. Ntangu yandi manisaka, yandi tubaka . . .

<sup>147</sup> Mpe kento mosi ya kutelama na manima kuna, na Louisiane, muntu ya France, tubaka, “Yina vwandaka ve ndinga yina me zabana ve, yina vwandaka Français.” Mpe awa vwandaka kento yankaka ya Suisse, na Lausanne, yina vwandaka zonza Français, Mu vwandaka kuna, yandi tubaka ti yandi tendulaka yawu mbote. Awa kwisaka bakala mosi ya ntwenia yina vwandaka tambula kuna, mu me monaka yandi ata fioti ve, muntu mosi ve me monaka yandi, yandi vwandaka mutendudi ya Francais samu na Nations-Unis, yandi tubaka, “Ya kieleka, ya kele kieleka,” yandi tubaka.

<sup>148</sup> Mpe muntu yayi ke tuba, mpe beno zaba bakala yayi, mu ke bokila nkumbu ya yandi kaka na minuti mosi. Nkumbu ya yandi vwandaka Henry. Mu ke kuzwa kaka nkumbu ya yandi ya nsuka na mwa ntangu fyoti, mu banza ti ya kele ya kusionika awa. Mu zaba ve. Ya kele na kati ya Ndinga ya Bantu ya Mumbungu,

kana ya kele ve mutindu yina. Kasi yandi. . . Oh, yinga, “Na Danny Henry.” Ntangu yayi ya kele. . . Mu lenda banza ve na star yina ya cinema. [Mpangi-bakala mosi me tuba, “Marilyn Monroe?”—Mu.] Ve, ya kele ve Marilyn. Meda, yinki. . . ? Jane Russell, mwana-nkasi ya Jane Russell. Mpe yandi kwisaka mpe tulaka maboko ya yandi na zulu ya munu, samu na kupesa munu mulabu, mpe tala bampova yina yandi tubaka. Yandi tubaka, “Ba lendaka tula dilongi yango na kati ya Buku ya Apocalypse.” Yandi tubaka, “Ya kele kieleka.” Yandi tubaka, “Mu zola kusambila samu na nge, Mpangi Branham.” Yandi yambaka munu, yandi bandaka na kutuba na Français, mpe yandi zabaka kima mosi ve samu na yawu.

<sup>149</sup> Mpe awa vwandaka ntendulu, yandi sonikaka yawu mutindu mwa bitini ya mampa kwisaka, na mutindu, mpe nionso yina. Yawu tubaka, “Munu, Victor D-e D-o-w-x,” nkumbu na Français, “mu kele muntu ya France,” mpe nyonso yina, “mpe ya vwandaka kuna ntangu—ntangu Danny” *yinki-benoke-bokilaka-yawu*, “Danny Henry, pesaka yayi na nsangu na zulu ya Mpangi Branham, na Ngonda ya zole na mosi, na mvula 1961.” Yandi ke zingaka na 809 Kings Road ya Nodi, Los Angeles 64. Beno kuwa—beno kuwa kutanga:

*Samu ti nge me sola nzila ya fyoti. . .*

Ntangu yayi, beno me mona, mu me bakula yawu nyonso mbote. Ya kele na ndambu ya yawu mu zaba ve.

*Samu ti nge me sola nzila ya fyoti, nzila ya mpasi, nge me tambula na nsodolo ya nge mosi. . .*

<sup>150</sup> Mu lenda kuzwa yawu nyonso mbote, beno me mona. Beno me mona, beno ke sola yawu beno mosi. Moise salaka nsodolo ya yandi mosi, yandi zolaka sala yawu ve. To mu zolaka baka nzila yayi ve. Mu zolaka kuzwa bayinzo ya nene kuna mutindu bayankaka na kati ya bawu kuzwaka. Mu zolaka vwanda bisika nyonso na televizyo. Kasi nani ke simbisa munu na—na kupasulaka mpe bafondasyo? Kasi kima mosi, mu fwana fukama ve na ntwala ya makulu ya muntu yankaka kasi Mfumu Yesu Klisto. Ya kele kieleka. Yinga. Mu ke longaka yina Biblia me tuba. Mu ke kakula ve na ba organisation ya bawu, samu mu kele ve ya bawu. Mu salaka nsodolo. Kaka mutindu Yandi tubaka kuna, “Mutindu mu vwandaka na Moise, mutindu mosi mu ke vwanda na nge.” Mpe Yandi pesaka Moise bidimbu zole ya nsiamisa, samu na kusiamisa. Mpe Moise salaka nsodolo ya yandi mosi. Beno me mona, Moise salaka nsodolo ya yandi mosi. Na yina ya kele mpasi ve na kubakula yawu, beno me mona, “Nge me sola. . .”

*Samu ti nge me sola nzila ya fyoti, nzila ya mpasi, nge me tambula na nsodolo ya nge mosi. . .*

Ntangu yayi awa, ntangu yayi muntu yayi, ntangu yayi beno tala mbote mutindu ya kele ya kusonika, beno lenda mona ti ya kele ya kusonika na—na bampova ya nzenza.

. . . nge me baka lukanu ya kieleka mpe lukanu, mpe ya kele NZILA YA MUNU.

Nzambi sakumuna! “Ya kele NZILA YA MUNU,” Yandi tubaka.

*Samu na lukanu yayi ya mpasi, kitini ya nene ya Mazulu ke vingila nge.*

Yandi me kuwaka ntete ve vision, beno me mona, ya yayi, beno ke bambuka moyo na vision.

. . . *kitini ya nene ya Mazulu ke na bunene ya nge. Wapi lukanu ya nkembo nge me baka!* (Beno me mona?)

Yayi, na yawu mosi. . .

Ntangu yayi awa kele, kubanda awa, mu me bakula ve.

*Yayi, na yawu mosi, ya kele* (Ba-parenthese ya nene ke vukana na yawu.) *yina ke pesa, mpe ke sala kusalama, lunungu ya nene na Zola ya Kinzambi.*

<sup>151</sup> Mu zaba ve yina ya zola kutuba, “yayi ke salama.” Mu banza na kati ya tenta mosi ya bilumbu yayi, ya kuvwanda na manima kuna, Yandi ke sala yawu kuzabana.

<sup>152</sup> Samu na yinki? Ve samu ti beto zolaka sala yawu. Ve samu ti ya—ti ya—ya—ya kele kaka nzila ya kukondwa mpasi. Beno lendaka zabana mingi, beno fwana kuzwa bantu nionso ke simba beno na mukongo, mbongo ke basika bisika nionso samu na radio to television, mpe nionso yina. Ba tubaka ti ba ke baka yawu mpe ba ke monisa yawu na televisyo. Mu ke kwikilaka ve na kubaka bima ya Nzambi mpe kubasisa yawu na mutindu ya busafu ya yinza. Mu ke kwikilaka ve na kubendama yayi nionso mpe kusala kima yina kele ve. Mu ke kwikilaka kaka na kubika yawu swi, kuingila. Nzambi, Yandi kele Nzambi, bika Yandi sala na yawu yina Yandi zola. Beto kele bisadi, beno sadila kaka Mfumu, beno sala kaka mutindu Nzambi tubaka. Muntu, na kati-kati ya nionso yina, ti, ba me tuma yandi na ngolo na kubaka lukanu.

<sup>153</sup> Ba tumaka bawu na ngolo na kubaka lukanu ntangu Klisto vwandaka awa na zulu ya ntoto, samu ti Yandi siamisaka na bawu ti Yandi vwandaka Mesiya. Ya kele kieleka? Mpe ba vwandaka tuma bawu na ngolo, mpe yinki ba vwandaka bokila Yandi? “Béelzébul, nganga-nkisi.” Na yina ya Yandi. . . na nzila ya kidimbu ya Yandi, Kidimbu, na Paki, Nzambi siamisaka yawu, ti Yandi vumbulaka Yandi na lufwa. Na manima ya bima nyonso yayi yankaka, Yandi vumbulaka Yandi na lufwa!

<sup>154</sup> Ntangu yayi dibuundu yina ke tubaka ti beno kele na Mpeve-Santu, kidimbu ya Nzambi samu na yawu, ti beno me luta lufwa

na Luzingu, samu bima ya ntama me luta, mpe bima me kuma ya malu-malu samu na beno. Yina kele kidimbu ya Nzambi ya mvumbukulu. Beno kele ve mutindu beno vwandaka, beno me soba! Kisika beno vwandaka tula ntembe na Ndinga ya Nzambi; konso Ndinga ya Nzambi ke tuba, beno ke tuba, "Amen!" Beno me mona, ya kele na kima me salama na beno. Ya kele kaka mutindu ya ntete ya mvumbukulu, Mpeve na kati.

<sup>155</sup> Ntangu yayi Pentecote. Na manima ya Pentecote, ntangu bantu yayi kuzwaka Mpeve-Santu, ba tumaka dyaka muntu na ngolo na kubaka lukanu, "Ya kele Nzambi to Yawu kele ve ya Nzambi?" Mpe yinki bawu tubaka? "Ba kele ba-eretiki. Ya kele bulawu. Ba kele na mabanza." Ata mpe Agrippa tubaka na Paul, "Nge kele kilawu." *Kilawu* zola kutuba "kidi-kidi."

<sup>156</sup> Mpe yinki Paul tubaka? "Na Nzila yina ba ke bokilaka kinzambi-nzambi, ya kele mutindu mu ke sambilaka Nzambi." Yandi vwandaka na Kidimbu ya Paki! Yandi vwandaka kuna ntangu kima mosi salamaka. Mu kele na kyese na kuvukana ya maboko na yandi na suka yayi, na ntima, mpe kutuba, "Paul!" Samu na yinki? Beto fwana longa Ndinga mosi. Paul tumaka bawu na kubotama, na Nkumbu ya Yesu, na manima ba botikaka bawu bampova yankaka. Yandi tubaka, "Kana wanzio katuka Mazulu kutuba kima yankaka, ti yandi vwanda ya kusinga." Yandi longaka Kubeluka ya Kinzambi. Yandi longaka ngolo ya mvumbukulu. Yandi longaka Yesu Klisto, mutindu mosi mazono, bubu yayi, mpe kukonda nsuka. Ba-vision, mpe bangolo mpe bakumonisama ya Mpeve landaka yandi.

<sup>157</sup> Beno fwana kuzwa Nsangu mosi, kima mutindu mosi. Théologie ve, mwa kuvukana ya dibuundu ve; kasi Ngolo ya Nzambi, Pentecote, mpe Kidimbu mosi. Kidimbu ya Mpeve-Santu, Kidimbu ya Nzambi ya kieleka ya Paki kele bamuswa ya bantu. Kieleka! Ya kele bukuluntu ya beno. Ya kele muswa ti beno me luta katuka lufwa na Luzingu, mpe Nzambi ke na kusalaka na nzila ya beno mutindu mosi Yandi salaka Mfumu Yesu, samu ti ya kele muswa ya beno. "Bidimbu yayi ke landa bayina ke kwikila. Beno kwenda na yinza ya muvimba," na manima ya Paki, na manima ya Pentecote, na manima ba pesaka Kidimbu ya Paki, ya mvumbukulu. Yinki ya vwandaka? Luzingu yina vwandaka na kati ya Klisto yina telamaka, me kwiza mpe me kindisa Dibuundu ya Yandi, mpe ke zinga na kati ya Dibuundu samu na kusala bidimbu mosi.

<sup>158</sup> Mu banza ti ya ke luta ve na zulu ya yintu ya beno. Mu ke na kivuvu ti mu ke kanga beno ntangu mingi ve ti beno—beno ke kuzwa ve kyese ya yina mu zola kutuba, beno me mona. Mu zaba ti ya kele mpasi, beno bantu ya kutelama. Pardo, kaka—kaka baminuti fyoti, beno meka kana beno lenda. Beno me mona, mu zola ti beno simba dibanza yayi, nkundi. Mu zola beno kumona yina kele na kati ya ntima ya munu, yina me vwanda awa bamvula makumi tatu na mosi, kubanda mu tulaka mwa

ditadi yango ya nsongi kuna na nsongi. Beno me mona, ya kele na Kieleka, mu mekaka na kutelama samu na Yawu. Ya vwandaka na mitindu nyonso ya bima yina basikaka na Yawu, ya kele kieleka, kasi ya ke vwandaka ntangu nyonso mutindu yina.

<sup>159</sup> Mu vwandaka tanga Martin Luther, yandi tubaka, “Ya vwandaka kima ya mpasi na kukwikila ti yandi zolaka telemina dibuundu ya Katolika mpe kuluta na yawu. Yina vwandaka kima ya nene. Kasi kima ya kulutila nene, ti mutindu yandi lendaka simba yintu ya yandi na zulu ya bufanatiki nyonso yina landaka réveil ya yandi, yina lendaka bikana kieleka na kati ya Biblia.” Beno tuba yina Nzambi me tuba, mpe beno tuba kima yankaka ve. Beno vwanda kaka na Yawu, beno tambula na lukanu ya kusungama, lukanu ya Nzambi. Na kisika. . . Kana Nzambi kubaka yawu mutindu *yayi*, beto vwanda kaka na Yawu. Yina kele lukanu ya Yandi. Amen. Yinga, tata. Yinga, tata.

<sup>160</sup> Kidimbu ya Pantekote kele bamuswa ya mukwikidi ti yandi me luta lufwa na Luzingu, samu yandi me kuzwa Lusakumunu ya pentecote, Kidimbu ya Paki ya Mwana ya Yandi. Yandi tulaka kidimbu na Mwana ya Yandi ya ntete na Mpeve-Santu. Ya kele kieleka? Kieleka. Mpe Yandi tulaka kidimbu na bana ya Yandi nionso yankaka na Mpeve-Santu.

<sup>161</sup> Ntangu yayi beto ke mona awa ti na kutula kidimbu yayi ntangu yayi na ntangu yayi, mutindu ntangu ya nsuka me belama. Ya kele na kisika awa yina mu fwana bula, pene ya bana, Bana ya babakala ya Cain kuna ntangu yayi, ba tumaka bawu na ngolo na kisika yina ba fwana baka lukanu. Beno me mona, ya kele mpasi samu na bawu na kusala, samu ti, kana bawu sala yawu, bawu fwana pesa bamuswa ya bawu ya denomination. Beno me mona? Mutindu mosi salaka ba-Pharisien. Beno zaba, ba-Pharisien bakaka lukanu na Yesu, ntangu Yandi siamisaka ti Yandi vwandaka Mesiya. Mpe ntangu Mpeve-Santu me siamisa Nzila yayi yina ba ke bokilaka kinzambi-nzambi, yina me siamisa ti Yawu kele Mpeve-Santu, muntu fwana baka lukanu. Ba lenda ve kuvwanda swi.

<sup>162</sup> Awa na nkokila yina, mu vwandaka kuna, mu vwandaka sambila samu na mama mosi ya kubela kuna na lupitalu. Mpe ntangu mu kulumukaka, mu kuwaka muntu mosi kuboka, “Billy!” Mpe mu talaka na nziunga. Ya vwandaka mosi ya bampangi ya beto awa, yandi kwisaka awa, Roy Slaughter. Yandi vwandaka ya kutelama kuna na couloir, mwa banzila, mpe yandi tubaka, “Kento ya mpangi ya munu ya bakala kele ya kubela. Nge ke kota mpe ke sambila samu na yandi, Billy?”

Mpe mu tubaka, “Kieleka.”

<sup>163</sup> Mu kwendaka kuna. Mpe ya vwandaka na mama yankaka ya kiboba, pene ya bamvula makumi sambanu, yina vwandaka me lala kuna, ya monanaka mutindu mwana ya yandi ya bakala vwandaka na lweka. Na manima mu tubaka na bawu mwa

ntangu fioti, mu tubaka, “Beto lenda...Beto ke vwanda na ndinga ya kisambu.”

Yandi tubaka, “Benda rido yina!”

Mpe mu tubaka, “Mbote mingi.” Mu tubaka, “Nge kele mukwikidi?”

Yandi tubaka, “Mu kele Methodiste.”

Mu tubaka, “Ya kele ve yina mu me yufula nge.” Mu tubaka, “Nge kele mukwikidi?”

Yandi tubaka, “Mu kele Methodiste. Beto kele ba-Methodiste. Beno benda kaka rido yina!”

<sup>164</sup> Mu salaka yawu ve. Mu sambilaka, na mutindu nionso, mpe mu sambilaka samu na yandi, na yina mu sambilaka Nzambi ke vulusa yandi. Kasi yawu yina, beno me mona, beno kele ve Muklisto, beno kele Methodiste. Beno me mona, beno kele—beno kele mukwikidi ve, beno kele Methodiste. Kimbangi ya beno mosi ke tuba yawu. Kyadi, bumbote, wapi mutindu ntama beno lenda kubwa na Biblia?

Bakwikidi! “Mpe bidimbu yayi ke landa bayina ke kwikila!”

<sup>165</sup> Nge kele Muklisto? “Mu kele Methodiste.” Yina ke lakisa ti nge kele ve Muklisto. Nge kele Muklisto? “Mu kele Dibuundu ya Klisto.” Yina ke lakisa ti beno kele ve Muklisto.

<sup>166</sup> Beno kele Muklisto samu ti beno kele mukwikidi. Mpe kana beno kele mukwikidi, Yesu tubaka na Marc, kapu 16, “Bidimbu yayi ke landa bayina kuzwaka Kidimbu ya Paki, tii na nsuka ya yinza.” Ya kele kieleka, beno kele mukwikidi.

<sup>167</sup> Mpe ba me tuma bantu na ngolo, ba me tuma bawu na ngolo ntangu yayi. Kima ke na kusalaka, mpe bawu me tumama na ngolo na kuyamba Yawu to kufundisa Yawu. Mpe yinki bawu ke na kusalaka? Bawu ke na kufundisa Yawu.

<sup>168</sup> Kasi yandi lendaka ve kusala yawu kuna na nsungi ya Pentecote, samu Pentecote ke vutuka kaka mpe ke bongisa, na kukwisaka, na kubongisaka bawu mosi na kati ya kima mosi yina bawu basisaka na ngaanda. Pentecote me basika. Pantekote kele organisation ve, Pantekote kele nzingulu yina ke kwizaka na mukwikidi. Kasi bawu salaka organisation na yawu, mpe salaka kima mutindu mosi yina bawu nwanaka na ngolo mingi samu na kubasika.

<sup>169</sup> Kima mutindu mosi yinsi mpe politiki salaka, me katuka awa na kimpwanza ya nsambulu, na malongi ya ntama ya kindumba ya Katolika; mpe vutukaka kaka mpe, na nzila ya kimpfofo ya politiki, ba soolaka mosi ya muntu ya bawu ya kulutila mfunu, millionaire, ba salaka yandi millionaire na nzila ya wiski mpe bansenga, mpe bima ya yinza, mutindu yandi kumaka millionaire, mpe tulaka yandi na zulu ya kiti ya kimpumu Maison Blanche, na systeme ya Katolika na manima ya

yawu. Na yina, yandi vwandaka ntete kuna bangonda sambanu, mpe ke siamisira ti ya kele kieleka.

<sup>170</sup> Mpe dibuundu ya ba-Pentecotiste basikaka na organisation, mpe bokilaka bawu, “madidi mpe ya misiku; mpe bakento ya bawu, mutindu bawu salaka; mpe bakala, mutindu bawu salaka.” Mpe Pentecote salaka organisation, mpe bakaka mpeve mpe vutukaka mbala mosi na kati ya yawu. Samu na yinki? Samu ti ba lakisa Dibuundu ya kieleka ya Nzambi na ngolo ya Yandi mpe na nkembo ya Yandi. Ba me tuma beno na ngolo na kukwikila Yawu. Ba me tuma beno na ngolo na kundima Yawu to kumanga Yawu. Nkembo na Nzambi! Ya kele na ntuala ya beno, mpe beno lenda manga Yawu ve. Beno fwana tuba “yinga” to “ve.” Ya kele ve na mutindu ya kubasika na yawu. Yinga, tata. Yinga, ba me tuma bawu na ngolo. Ya kele ve na kisika ya kati-kati. Yinza ya muvimba fwana kuzwa Yawu to kumanga Yawu. Mpe ya kele mutindu yina bubu yayi.

<sup>171</sup> Ntangu yayi beto ke mona ti na manima ya Paki, Yesu, na Marc 16, tubaka na bawu, “Beni kwenda na yinza ya muvimba mpe beno longa Nsangu ya mbote, bidimbu yayi ke landa.” Mpe bakala . . . Nzambi na yina tumaka na ngolo nzila na bantu yayi. Ba zolaka mona bantu yina vwandaka na Kima mosi! Mpe yina ya nsuka bamvula bankama tatu na sambanu na manima ya lufwa ya Klisto. Na yina yinki me kota na Dibuundu? Ba vwandaka bantu ya katolika, ya kele kaka kieleka, bantu ya katolika ya pantekote. Mpova *katolika* zola kutuba “ya bayinsi nyonso.” Dibuundu ya muvimba kele ya yinza ya muvimba. Mpe bawu vwandaka bantu ya pantekote.

Na yina yinki bawu salaka? Bawu kwendaka kukota na kati ya bantu ya mumbongo, na kusobaka bayankaka, na kukotisaka bawu. Mpe bawu kuzwaka mabanza ya nene ya kimvuka.

<sup>172</sup> Mpe kima ya ntete, beno zaba, na kati ya Biblia, beto talaka na malongi ya beto ntangu beto longaka *Bansungi Ya Dibuundu*, ti Yesu tubaka na yandi na ntuala yawu salama, pene ya bamvula bankama zole, ti ya ke vwanda na malongi, to ntete ya ke vwanda bisalu ya ba-Nicolaite, mpe kuna na nsuka kumaka malongi. Mpe na yina ntangu ya salaka mutindu yina, Yandi tubaka, “Mu ke yinaka yawu!” Mpe yinki ba-Pentecotiste salaka? Bakumata mpe kukita ya Pentecote, kalasi ya kifuluka na amidon, yina ba me bongisa mpe me salama na dibuundu ya Katolika, mama ya ntete ya organisation.

<sup>173</sup> Ba tumaka na ngolo mwa nkonga ya fioti na lweka mosi. Mpe ya vwandaka kaka mutindu yina kubanda kuna. Ba me kulumuka bamvula difunda mosi na bankama tanu, mpe mwa nkonga yina ya fioti nungaka yawu. Amen!

<sup>174</sup> Muntu mosi tubaka kilumbu yina, yandi tubaka, “Beni banza na dibuundu ya Katolika, bitumba yikwa ya nene yandi nungaka.” Bitumba ya nene? Ya kieleka, na—na musiku na lweka

ya yandi, na yinsi na lweka ya yandi, na politiki na lweka ya yandi!

<sup>175</sup> Beno banza na mwa Pentecotiste yina vwandaka na kima yankaka ve kasi Mpeve-Santu, kasi Yandi nungaka yawu. Mpe kaka awa na suka yayi, kele kimbangi ya moyo ti Yandi ke zinga dyaka, mpe Yandi ke zinga kukonda nsuka. Organisation ve; bakwikidi ya Pentecote, ya kieleka! Ya kieleka.

<sup>176</sup> Ntangu yayi, na manima ya Paki, yayi salamaka, ba tumaka na ngolo na kubaka lukanu. Muntu fwana kubaka lukanu, ba fwana baka yawu ntangu yayi. (Mu ke na kuluta milabu mingi yayi.) Ve na kati-kati ya ntoto!

<sup>177</sup> Mpe bana ya Satana ke tulama kidimbu na bilumbu yayi ya nsuka. Ya kele na ntangu ntangu yayi, yina Biblia zonzilaka, ti nyonso yina vwandaka ve na Kidimbu ya Nzambi bakaka kidimbu ya kibulu. Mpe beto zaba ti kidimbu ya kibulu kele ya kukondwa kukwikila. Mbala ya ntete. . . “Mbote, wapi kisika beno ke tuba kidimbu ya kibulu bandaka?” Na disamba ya Eden. Kidimbu ya kibulu mpe Kidimbu ya Nzambi kusalamaka na nsaba ya Eden. Kieleka. Ya me salama na nzila ya Paki, samu na lufwa ya Abel basisaka Seth. Ya kele kieleka. Beno tala.

<sup>178</sup> Caïn vwandaka mwana ya Satana. Yandi vwandaka mwana ya kibulu yina vunaka Eve. Beno lenda bokila yawu nyonso yina beno zola. Yandi vwandaka mwana ya Satana. Mpe yinki yandi salaka? Nzambi tulaka kidimbu na zulu ya yandi, mpe fidisaka yandi na Mvwandulu ya Nzambi. Ya kele kieleka? Mpe yandi kuzwaka yandi kento, ve na ngaanda ya difwa ya Nzambi; kasi yandi kuzwaka kento mosi samu na yandi na yinsi ya Nod, yinsi yankaka.

<sup>179</sup> Mpe yinki organisation salaka? Yawu bikaka lukwikilu ya kieleka ya Pentecote ntangu yawu salaka organisation, mpe basisaka kento na organisation. Ya kele kaka kieleka. Ntangu yayi yina yandi salaka: Beno tala mutindu—beno tala mutindu kento ya Pantekote bandaka na kusala, mpe yina yandi ke tuba mpe yina yandi ke na kusalaka, beno tala nsalulu ya yandi. Mpe ya ke telema kuna na manima, mpe ke na kumekaka na kufiotuna ntangu yayi. Kima yina kaka yandi simbisaka ntete, yandi ke na kumeka na kuzenga Yawu, na kufika Yawu, samu ti Yawu ke telemina ba-credo ya yandi. Mutindu ya vwandaka kuna. Kasi ba ke tuma yandi diaka na ngolo na kubaka lukanu. Yandi fwana sala yawu. Yandi fwana sala yawu.

<sup>180</sup> Nzambi, sadisa munu mpe bampangi ya munu yina ke telama na munu. Sadisa, Nzambi, sadisa beto na kutelama kuna na nswalu nionso. Ata ti kana ya kele menga ya bambangi, beno telama kuna! “Mu fwana nwana, kana mu fwana yala, matisa kikesa ya munu, Mfumu.”

<sup>181</sup> Ntangu mu ke mona Mpeve-Santu ya Yandi kusala na kati ya bantu mpe kusala bima mutindu mosi, Mu zaba ti Yandi kele



Yesu Klisto yina mosi yina vumbukaka na lufwa! Amen. Yina ke sukisa diambu, landila mutindu mu ke zaba. Beno me mona? Amen. Kuna na ba-Romain 4:25, na nsuka, na kuzonzilaka na Abraham. “Ba yekulaka Yandi samu na bayimbi ya beto, mpe vumbukaka dyaka samu na kunungisama ya beto.”

<sup>182</sup> Éphésiens 4:30, Mpeve-Santu kele Kidimbu ya Paki ya Nzambi yina ke tula beto kidimbu samu na Seko. Amen. Tulaka beto kidimbu samu na Seko, Mpeve-Santu ya Nzambi! Oh, beno kele—beno kele na kyese? Beno kele na kyese samu na Paki? Beno kele na kyese samu na nzingulu yayi? Ba me tula kidimbu, ya kukanga na Nzambi na kisika ya kinsweki, ya kukanga na Nzambi na lemvo ya Yandi ya Kinzambi, ba me tula kidimbu tii kilumbu ya mpulusu ya beto. Yina kele Kidimbu ya kieleka, ya kieleka ya Paki.

<sup>183</sup> Wapi ntangu beto me kuzwa? Ve, baminuti tanu tii ngunga kumi na zole. Beno ke kwikila? [Dibuundu me tuba, “Amen.”—Mu.] Beno me kwikila? Beto kulumusa bayintu ya beto na mwa ntangu fioti.

<sup>184</sup> Tata ya beto ya Mazulu, ata yina mu ke tuba, mpe kasi muntu lendaka kwikila Ndinga yayi samu Yawu kele ya kusonika awa. Mu ke sambila ti muntu yina bisika nionso ke kuzwa Nge ntangu yayi mutindu Kidimbu ya bawu ya Paki, bambuma ya ntete ya mvumbukulu, na kuzabaka ti bawu me luta lufwa na Luzingu; kisika lufwa vwandaka mbala mosi, ntangu yayi Luzingu ke bakaka kisika ya yawu. Mu ke sambila ti Nge ke lakisa na dibuundu yayi, na suka yayi, ti Nge kele kaka Yesu, ti Nge kele kaka Yandi Yina ke salaka bimangu mpe ke sobaka kima yango. Mpe na kuzabaka, mpe mu tubaka kaka, mutindu ya vwandaka ya kusiamisa na tata Abraham, ti Wanzio yango kutelamaka na manima ya Yandi na nkonga ya bantu, to na Sarah, mpe tubaka yina yandi vwandaka tuba mpe vwandaka banza. O Nzambi, beto me mona yawu ntangu na manima ya ntangu! Beto me mona nsiamisa, kisika ya Mwana, kupesa Nkumbu. Beto me mona bima yayi nionso kusalama, Mfumu, mpe beto zaba ti beto me kuma na ntangu ya nsuka. Yayi kele Paki. Bantu mingi kele ya kutelema, makulu ke na kutekita.

<sup>185</sup> Mpe ntangu yayi, Tata, nyonso yina mu lendaka tuba lendaka ve kutuba kima mosi na manima Nge me zonza, kana ti ya kele ve landila yina Nge ke zonza. Mpe kana mu me tuba Ndinga ya Nge, na yina, Tata, mu ke kwikila ti Nge kele Nzambi yina ke siamisa Ndinga yina. Mu ke sambila ti Nge ke pesa yawu. Bika ti Mpeve ya Nge, Mfumu, kukota na kati-kati ya bantu, mpe kupesa kimbangi yayi na bantu.

<sup>186</sup> Mutindu beto me kulumusa bayintu ya beto, bisika nionso, ya lendaka vwanda na kimbevo na kati awa. Ya kele ve na ntembe na nyonso awa kasi yina kele na kimbevo na kati-kati ya bantu. Mu zola zaba, bantu yikwa na kati awa yina kele na ngaanda ya

mbanza, yina kele ya kubela? Beno telemisa diboko ya beno; na ngaanda ya mbanza. Mbote, bawu kele kaka bisika nyonso.

<sup>187</sup> Mbote mingi. Beno lenda telemisa yintu ya beno. Mu ke lomba yawu samu beno kumona. Nyonso yina kele na ngaanda ya mbanza yina mu zaba ve, yina kele na ngaanda ya mbanza mpe mu zaba nge ve, telemisa diboko ya nge, tuba, “Mu kele ya kubela.” Beno telemisa maboko ya beno bisika nyonso ntangu yayi, samu ti mu kuzwa kaka dibanza ya nene. Awa, awa, kaka na nsongi yayi, mpe kuna na manima. Mbote mingi. Ntangu yayi, beno tala kyuvu yayi: Yayi kele kieleka yina mu me longa? Kana ya kele mutindu yina, kusalu ya Nzambi na kusala yawu.

<sup>188</sup> Kana Yandi bumba yayi ve, ya kele ve na mvumbukulu. Kana Yandi bumba yawu, ya kele kivuvu ya mvumbukulu. Ya ke lakisa ti Kidimbu ya Paki, ti Yandi kele ya kufwa ve, kasi Yandi ke na kuzinga. Na yina samu na kufundisa ti ya ke vwanda kuvweza samu na Mpeve-Santu, mpe ya kele ya lenda kuzwa mulemvo ve. Ntangu yayi, kana Mpeve-Santu kukwiza na lukutakanu yayi. . .

<sup>189</sup> Mu vwandaka . . . mu banzaka ti beto ke telemisa kaka bantu, kasi beto lenda vwanda ve na ndonga ya bisambu. Beno tala awa, kaka awa, bana ya fyoti bisika nyonso na ba-autel, mpe bisika nyonso. Beto lenda ve kuzwa ndonga ya bisambu.

<sup>190</sup> Kasi, beno tala, mu zola kuyufula beno kima mosi. Yandi kele kaka na kisika mosi, to Yandi kele yina kele bisika nyonso? Yandi kele bisika nyonso. Ntangu yayi wapi mutindu mu lenda zaba beno, ti beno me telemisa maboko ya beno ti mu zaba beno ve, mpe beno kele banzenza awa? Mu ke zola ve bantu ya tabernacle, mu ke mona beno na ntwala, beno me mona. Kasi kaka bantu, samu ti beno mona ti ya kele na ngaanda ya mbanza yina mu zaba ve. Ti Mpeve-Santu kuzonza kana ya kele kieleka to ve. Ti Yandi sala kuzonza, kuna bandinga ya munu ke vwanda kima mosi; mpe kana ya kele Ndinga ya Nzambi, Nzambi ke zitisa Ndinga yina.

<sup>191</sup> Ntangu yayi beno bambuka moyo, ba-Pentecotiste, bakwikidi ya kieleka ya Nzambi, ke vwandaka ntangu nyonso na kati ya bantu fioti. Mpe bawu kele nkonga yina ba me seka mpe yina ba me vweza; mpe bantu ke zola ve kubaka nzila yina. Ntangu ba vwandaka ba-Luthérien, Nzambi pesaka bawu kunungisama mpe ba talisaka bawu mpasi, ba sekaka bawu, mpe ba kufwaka bawu.

<sup>192</sup> Kasi Luther kotaka mbala mosi, bongisaka yawu na manima ya lufwa ya Martin Luther. Ve, Luther bongisaka dibuundu ve. Ve, tata. Kasi bantu na manima ya yandi kusalaka, dibuundu. Wesley ata mbala mosi ve bongisaka kima. Ve, tata. Ya vwandaka bantu na manima ya yandi. Mpe ntangu yayi, na manima ya ba-Pentecotiste, bawu kotaka, salaka organisation na yina bawu basikaka. Beno me mona?

193 Kasi ya kele kisika beto ke kumaka, beno me mona, beto ke vutuka mbala mosi na ba-credo ya beto, mpe Nzambi. . . Kaka minuti (mu lenda lakisa yawu na nzila ya Biblia.), ti dibuundu mosi ke baka organisation, ke baka kidimbu ya kibulu. Bantu ve na kati ya dibuundu, kasi sysiteme ya dibuundu, samu ti sysiteme ya dibuundu kele Katolika. Katolika: ke sala yawu nyonso ya yinza, kukotisa yawu, nyonso. Beno me mona? Mu lenda lakisa na kapu ya 17 ya Apocalypse ti yandi vwandaka kento ya kindumba mpe bana ya yandi ya bakento vwandaka bandumba, bakento ya kindumba. Konso organisation ke na kundima. . . ya ke na kundima mambu ya kento ya kindumba; mpe beno tala mbote kieleka yina yandi salaka, kaka kieleka mutindu mama ya yandi kusalaka. Na yawu yandi kele na nswalu. . . Bantu ve na dibuundu, ntangu yayi. Ba-méthodiste kele bantu ya kieleka.

194 Mu banza ti beno ke kuzwa bande kisika Mfumu zonzaka mpe lakisaka yina zolaka salama na dibuundu yina na kati ya ntangu yayi ya nene kaka na ntuala ya beto, ntangu lufundusu ke belama na kubula ntoto. Mpe beno tala mbote yina ke salama na dibuundu.

195 Kasi yintu ya yandi ya bakala kufwaka, beno zaba. Kasi ntangu. . . Yandi vwandaka mufwidi ya kento ntangu Elie vutukaka na nzyetolo ya yandi na ntoto ya kuyuma; yandi vwandaka mufwidi ya kento. Ba tindaka yandi, yandi vwandaka na kiese na kuwa profete yina kuna, na manima ya yintu ya yandi ya bakala kufwaka. Beno me mona. Ba tulaka organisation ya yandi na kati ya Kimvuka ya Mabuundu, yandi monaka kisika yandi vwandaka, mpe yina profete yina tubaka salamaka, yandi vwandaka zola. Nzambi zolaka kaka yandi mpe profete kwendaka kuna mpe kebaka yandi moyo tii yandi sabukaka Jourdain mpe nzala sukaka. Yinga, ya kele kieleka.

196 Wapi kizizi ya kitoko ya Nkwizulu ya Mfumu kaka kuna na Elie. Ya kulunga. Mpe beno bambuka moyo, Nsangu yayi na bilumbu ya nsuka ke pesama na Elie, profete; mpeve ya yandi na zulu ya dibuundu. Kieleka. Kieleka. Beno zaba yinki mpova Elie zola kutuba? Mbote mingi. Ntangu yayi, beto sambila. Mpe bika ti Mpeve-Santu. . .

197 Mu zola kuyufula beno bantu kima mosi. Ntangu yayi, beno me mona, ya kele Nzambi Nzambi ya moyo? Yandi kele awa? Na yina kana Yandi kele, mu zola kuyufula beno kima mosi. Ntangu yayi, na manima mu me zonza, bantu yikwa na kati awa yina kele. . . ke kwikila ti ya kele kieleka? Ya kele na muntu awa yina ke zola kutuba, “Mu kele ve Muklisto, Mpangi Branham. Mu ke zola kuvwanda. Beno sambila samu na munu?” Mu lenda bokila ve autel awa, samu ti mu—mu lenda ve. Beno telemisa kaka diboko ya beno, beno tuba, “Sambila samu na munu.” Ya kele na muntu na kati ya kivinga? Nzambi sakumuna nge, nge,

nge, nge. Ya kele mbote. Mbote mingi. Nzambi sakumuna beno, bisika nyonso, bisika nyonso. Mbote mingi, mbote. Mbote mingi.

<sup>198</sup> Ntangu yayi, beno kele na muswa, na manima ya nsangu mutindu yayi, beno kele na muswa ya kubokila diboko ya munu, mpe kutuba, “Mpangi Branham, nge me longa beto kima mosi, ti na bilumbu yayi ya nsuka nge tubaka ti kidimbu ya nsuka vwandaka ntangu Yandi salaka, lakisaka ti Yandi vwandaka Nzambi.”

<sup>199</sup> Mpe mu kuwaka mulongi ya ba-Juif kilumbu yankaka yina, vwandaka kaka. . . Mu vwandaka. . . Na nzila ya nsangu ya munu na zulu—na zulu ya munkayulu ya mwana ya ngombe ya mbwaki, bakala yango kwizaka mpe yambaka Klisto, basikaka na dibuundu yina ba basisaka na nzila ya ba-rabbin bamvula mpe bamvula mpe bamvula, samu—bamvula bankama yiya to tanu, kuna, ba-rabbin nionso. Mpe muntu kuwaka nsangu ya munu, kotaka na malembe na lukutakanu mpe kuwaka ti “mwana ya ngombe ya mbwaki,” mpe ndimaka yawu na Buklisto. Mpe telemaka na yinzo-Nzambi kilumbu yina, mpe tubaka, “Muntu nionso yina ke kwikila ve ti ya vwandaka na Banzambi tatu na kisika ya Mosi. . .” Yandi vwandaka kwikila na Nzambi mosi tii na ntangu yina. Yandi vutukaka manima, na kisika ya kusala kima yankaka. Yandi tubaka ntangu Abraham, ntangu bawu tatu kwisaka, yina vwandaka Tata, Mwana, mpe Mpeve-Santu kwisaka na Abraham.

<sup>200</sup> Ntangu yayi, mu zola kutala yawu mbote, beno nata kaka kima yina beno ke bambuka moyo. Ntangu Abraham kumonaka tatu ya Bawu kintwadi, yandi tubaka, ve bamfumu ya munu, kasi, “Mfumu ya munu.” Kasi ntangu Lot, mpangi ya yandi ya denomination, ntangu yandi monaka zole ya bawu, yandi tubaka, “Bamfumu ya munu.” Ya ke lakisa kisika beno kele. Beno me mona? Lot bokilaka bawu bamfumu ya yandi. Abraham bokilaka tatu ya Bawu, “Mfumu ya Munu.” Ya vwandaka kaka na mosi ya Bawu kuna, vwandaka Mfumu. Ya kele kieleka. Elohim.

<sup>201</sup> Mpe kuna Bawanzio zole, yina vwandaka kima yankaka ve kasi minati-nsangu, kwendaka kuna; mpe Lot, mpangi-bakala yina ya nene ya ba-trinitaire, zolaka bokila bawu bamfumu ya yandi. Beno zaba, “Kwisa kaka.” Beno me mona kondisyo yina yandi kotaka samu ti yandi vwandaka kuna na bima ya yinza? Kento ya yandi, mpe bana ya yandi nionso ya bakento kuna mutindu yinza ya muvimba, mpe dibuundu ya bawu ya madidi, ya misiku. Ya kele mutindu beno ke kuzwaka.

<sup>202</sup> Yinki Wanzio salaka? Yandi siamisaka ti Yandi vwandaka Mfumu Nzambi. Ntangu yayi, Mpeve-Santu yayi yina mu ke tubila ntangu yayi, ti Yandi lakisa ti Yandi kele kaka Mfumu Nzambi. Ti Yandi lakisa ti Yandi vwandaka Mosi yina.

203 Ntangu yayi, beno sambila. Ntangu yayi, beno zola . . . ? Beno bika mu yufula diaka. Bantu yikwa na kati awa, beto baka kaka mwa kitini ya ntangu, bantu yikwa awa, beno ke tuba, na kati awa ti—ti beno kele ya kubela, mpe mu zaba ve ti beno—ve, beno kele banzenza, mpe beno zola Nzambi kubelusa beno? Beno telemisa diboko ya beno. Ntangu yayi, beto tala na kati ya nkonga yayi awa. Mbote mingi. Mbote mingi. Ntangu yayi, beno tula maboko ya beno na mwa ntangu fioti.

204 Bika ti Nzambi kuzonza. Ntangu yayi, mu telemisa diboko ya munu, mu zaba bawu ve; mu zaba bawu ve. Ntangu yayi, kana Yandi kele kaka Nzambi, Yandi ke sala kima mutindu mosi ve? Kento yina simbaka lele ya Yandi . . .

205 Bayankaka na kati ya beno bakento, to bayankaka na kati ya beno kuna yina me telemisa diboko ya beno, ya kele na kento mosi kisika mosi kuna, mu ke kwikila. Wapi? Mama yayi ya ntwenya kuna na nsuka. Nge zola, telemisa diboko na nge? Mbote mingi. Nge vwandaka? Mbote mingi, mu kele nzenza samu na nge? Mu zaba nge ve? Mbote mingi.

206 Beno me mona kaka kana Yandi kele dyaka Nganga-Nzambi ya Ntete yina lenda simbama na bansatu ya bimbevo ya beno. Mu me monaka nge ata fioti ve na luzingu ya munu. Nge kele nzenza samu na munu. Mu zaba kima mosi ve samu na nge. Nzambi me zaba nge. Mpe kana Yandi lenda monisa na munu na nzila ya Mpeve-Santu ya Yandi, Klisto yina me vumbuka na lufwa me kwisa awa, mpe pesa munu mwa ntangu fioti mvumbukulu na mpeve ya munu, ti mpeve ya munu ke kwenda ntama ntangu yayi mpe Mpeve ya Yandi ke kota, na yina beno zaba kana Yandi kele moyo to ve. Ntangu yayi, mu zaba beno ve. Ya kele munu, munu mpe mpeve ya munu, beto zaba nge ve. Kasi Yandi zaba nge. Kasi Yandi zola defa nzutu ya munu samu na kulakisa ti Yandi kele Klisto yina me vumbuka na lufwa. Mu kele na kyese mingi na kulakisa yawu na Yandi, pesa yawu na Yandi, nyonso yina Yandi lenda basika na yawu.

207 Kana Nzambi ke tuba na munu yina nge kele awa, nge ke kwikila munu? [Mpangi-kento me tuba, “Yinga.”—Mu.] Nge ke sala yawu. Nge kele na misisa ya misisa. Kana ya kele kieleka, telemisa diboko ya nge. Nge kele na ya kulutila yina; nge kele na hernie. Ya kele kieleka. Beno kele ve ya mbanza yayi. Beno kele ya Lima, na Ohio. Nkumbu ya nge kele Mama Stoddard. Ya kele kieleka. Bakala ya nge kele ya kuvwanda na manima ya nge. Ya kele kieleka. Nge ke kwikila ti Nzambi lenda tuba na munu yina kele mpasi ya yandi? Yandi kele na mpasi na mukongo ya Yandi, yandi ke na kimbevo na mukongo ya yandi. Kana ya kele kieleka, telemisa diboko ya nge, tata. Nge ke kwikila?

208 Muntu yankaka awa telemisaka diboko ya bawu, na lweka yayi awa. Awa, mama yina kuna. Mbote mingi. Mu zaba nge ve. Ya kele bakala ya nge yina kele pene-pene ya nge kuna. Kima

yina beno ke zola kele mbotika ya Mpeve-Santu. Kana ya kele kieleka, beno telemisa diboko ya beno. Ya kele kieleka. Mbote mingi, kwikila na Mfumu, kutula ntembe ata fyoti ve.

<sup>209</sup> Mu monaka muntu mosi me katuka ntama, kasi mu lendaka tuba kaka ve kisika ya vwandaka. Yinga, ya kele muntu ya kuvwanda kaka awa, mu ke mona yandi ntangu yayi. Yandi kele nzenza samu na munu, mpe. Nge kele na kimbevo ya vésicule biliaire, mpasi ya sinusite. Nge kele ya awa ve. Nge me katuka na Georgie, kisika ba me bokila mutindu Hubbermill, na Georgie. Mbote mingi, kwikila ntangu yayi, mpe vutuka na yinzo mpe beluka.

<sup>210</sup> Nge ke kwikila na ntima ya nge ya muvimba? Ya kele na mosi ya kuvwanda kaka awa na manima, na manima, Nsemo yango ya kutelama na zulu ya muntu. Ba ke sambila samu na muntu ya luzolo yina kele na cancer, yina me vulukaka ve. Kwikila, vwanda na lukwikilu, mpe kutula ntembe ve.

<sup>211</sup> Mu ke tala kaka mbote. Um-hum. Yawu yayi awa. Mama yina me kulumusa yintu ya yandi, ke sambila. Yandi kele na mpasi na makulu ya yandi mpe mabolongo ya yandi. Mu zaba nge ve, mutindu yina? Beto kele banzenza, telemisa diboko ya nge. Beno ke vutuka na . . . yinzo ya beno kele na New Hampshire, ya kele kisika nge me katuka. Kwikila, mpe Mfumu ke belusa nge.

<sup>212</sup> Mama yina me vwanda kuna na mwa mwana ya kento, ke sambila samu na yandi; na mpasi ya rein, yina me vwanda kuna na manima. Yandi me katuka na Georgie, mpe. Mama Cason, kana nge ke kwikila na ntima ya nge ya muvimba! Nge ke ndima Yawu? Mbote mingi, na yina vutuka na yinzo, beluka. Mu zaba ve kento yayi, mu me monaka yandi ata fioti ve na luzingu ya munu. Kana beto kele banzenza mosi na yankaka, ningisa diboko ya nge, mama. Ya kieleka.

<sup>213</sup> Awa kele na yankaka ya kuvwanda kaka awa, bakala mosi. Yandi me katuka na Georgie, mpe. Mu zaba yandi ve, mu me monaka yandi ata fioti ve. Kasi mu monaka yandi me basika na yinsi yina ya ntama. Kieleka. Yandi kele na mpasi na foie, ya kele kieleka, mpe arthrite. Yandi kele ya kuvwanda kaka na kiti ya manima. Nge ke kwikila na ntima ya nge ya muvimba, tata? Mbote mingi, vutuka mpe beluka.

<sup>214</sup> Ya kele na muntu yina kele pene-pene ya nge, mama, kuna na manima na ndonga ya kieleka. Ve, ya kele ve samu na yandi. Yandi ke na kusambilaka samu na mwana ya yandi ya bakala. Ya kele kieleka. Nge ke kwikila ti Nzambi lenda tuba na munu yina kele dyambu na mwana ya nge ya bakala, mama? Mu kele nzenza samu na nge, kasi Nzambi zaba nge. Ba-ulcere, mpe mpasi ya yintu. Mpe yandi kele awa ve; na Dayton, na Ohio. Kana ya kele kieleka, telemisa diboko ya nge. Ntangu yayi kwikila.

<sup>215</sup> Beno zaba ti Yandi kele moyo? Yandi kele Yesu mosi mazono, bubu yayi, mpe kukonda nsuka? Ya kele na bantu pene ya nana

to kumi yina mu me monaka ntete ve na luzingu ya munu. Mpe ya kele kieleka? Ntangu yayi ti Nzambi ya Mazulu, Yina kele awa, belusa mpe belusa, bayayi. Mbote, ya me katuka na kupakulama ya Mpeve-Santu, munu ve. Bika ti Nzambi yina lenda swasikisa mabanza ya dibanza, mpe kukitalisa Yandi mosi ti Yesu Klisto kele Klisto mutindu mosi mazono, bubu yayi, mpe kukonda nsuka, bika Yandi kwisa mpe belusa bambevo. Yandi kele Nzambi ntangu nyonso! Beno ke kwikila yawu? Ntangu yayi bantu yikwa zola kukwikila Yandi malu-malu yayi, mpe kundima Yandi mutindu Mvulusi mpe Munganga, mpe mutindu Mubotiki mpe Ntinu yina ke kwiza? Na Nkumbu ya Yesu! Oh, Alleluia! Yinki? Kidimbu ya Paki, Kidimbu ya Paki yina ke kubwaka ve!

216 Yinki kele kima yankaka? Kusoba ya nzutu yayi, samu na kukutana na Mwana yina ke kwisa. Beto ke soba na mwa ntangu fioti, na mbwetolo ya disu. Beno kele na bidimbu ya beno nyonso yina beno zola; kasi Kidimbu ya kieleka ya Paki kele Mpeve-Santu na kati ya ntima ya muntu! Beno ke ndima Yawu? Beno ke kwikila na mvumbukulu ya Yandi? Beno ke kwikila ti Yandi ke zinga mvula na mvula? Nge ke kwikila ti Yandi kele awa? Beno me ndima Yandi mutindu Mvulusi ya beno, mutindu Munganga ya beno, mutindu Nzambi ya beno, mutindu Ntinu ya beno yina ke kwisa? Beno kwikila na ntima ya beno ya muvimba!

217 Mutindu bamuswale yayi, ke sambila samu na bawu. Nzambi, na Nkumbu ya Yesu Klisto! Bantu mingi ke pakula yawu. Mu ke kwikila ti ba bakaka na nzutu ya Paul, bamuswale mpe bitenda ya bilele, mpe ba belukaka. Beno ke kwikila yawu?

218 Ntangu yayi bantu yikwa dyaka kele awa, ya kubela? Ntangu yayi bantu ya tabernacle, mpe na kizunga yayi awa, yina kele pene-pene awa, ntangu yayi beno telemisa maboko ya beno, yina me katuka awa. Ntangu yayi beno ke kwikila ti Yandi kele awa? Beno ke kwikila ti Mpeve-Santu kele awa? Ntangu yayi, beno vingila, samu na yinki beto ke vingila kima yankaka? Yandi kele awa, na yina beto sala na zulu ya yawu! Charlie, yinki nge ke banza? Amen. Alleluia! Oh, ya fwana salama!

219 Mu lenda belusa muntu ve. Mu lenda sala yawu ve. Ya kele na kima ve na kati ya munu samu na kubelusa. Kasi kana beno ke ndima Mpeve yayi yina kele na zulu ya munu ntangu yayi, ya lendaka vwanda dyaka ve na bampeve mingi ya yimbi na difelo yina ke sala beno ntembe na Yawu, mpe beno fwana beluka. Mu kele Munganga ve; Yandi kele Munganga. Mu lenda mona baviision ve; Yandi kele Yina ke zonzaka. Ya kele kaka nzutu ya munu Yandi ke na kusadilaka.

220 Ntangu yayi Nzambi mosi yango tubaka, "Bidimbu yayi ke landa bayina ke kwikila." Bakwikidi yikwa kele awa? Nge ke kwikila ti nge ke mukwikidi? Mbote, Yandi tubaka, "Bidimbu yayi ke landa bayina ke kwikila. Kana bawu tentika maboko na

zulu ya bambevo, bawu ke beluka.” Ya kele kieleka? Ntangu yayi beno tula maboko ya beno na zulu ya mosi na yankaka, mpe beno bika mu sambila samu na mosi na mosi ya beno. O Nzambi! Oh, mpangi! Kima fwana salama. Kima fwana salama kaka.

<sup>221</sup> O Kidimbu ya nene ya Paki, lis ve na kati ya mbungu, kasi Lis na Kiwanda. Nge, Yina zonzaka na nzila ya mwana ya bakala yina kilumbu yankaka yina, Nge me basika na nzila ya Ndinga ya Nge. Nge me talisa ti Nge kele Kieleka. Nge kele Kieleka, Mfumu. Nge kele Mvumbukulu. Nge tubaka, “Mu kele Mvumbukulu, mpe Luzingu: yandi yina ke kwikila na Munu, ata ti yandi me kufwa, kasi yandi ke zinga: muntu nionso yina ke zinga mpe ke kwikila na Munu ke kufwa ata fioti ve. Mu kele Mvumbukulu, mpe Luzingu.” “Mu kele”; ve “Mu ke vwanda, mu vwandaka”; “Mu kele ntangu yayi, Mvumbukulu mpe Luzingu.”

<sup>222</sup> Yandi yina salaka bimangu yayi kele Yandi Yina longaka Ndinga yayi. Biblia ke tuba ve ti Ndinga ya Mfumu kwisaka na profete? Nani vwandaka mosi na bilumbu, bawu kwendaka, samu na kutala kisika luzayikisu ya kieleka ya Nzambi vwandaka? Vwandaka profete. Mpe wapi mutindu bawu zabaka ti yandi vwandaka profete? Samu yandi vwandaka na kidimbu ya profete, kidimbu ya profete. Nani kele profete kuna? Mpeve-Santu.

<sup>223</sup> Mpeve-Santu sonikaka Ndinga, Mpeve-Santu. Munu ve! Yandi! Yandi kele Yandi! Mu tubaka kaka na beno, Yandi bakaka kaka nzutu ya munu. Yandi ke bakaka kaka ndinga ya munu, ke baka meso ya munu, samu ti Yandi zabaka ti mu ke pesa yawu na Yandi, na yina Yandi kwisaka mpe salaka munu kusala yawu. Na yina ya kele munu ve! Ya kele Yandi! Mpe munu ve kuna na beno, ya kele Yandi kuna na beno. Yandi kele Mvumbukulu mpe Luzingu. Oh, Nzambi, Nzambi; kwikila yawu. Oh, bantu: Kwikila Yandi. Kwikila Yandi. Yandi kele awa.

<sup>224</sup> Ntangu yayi, mu zola ti mosi na mosi ya beno yina beno kele ya kutelama kuna, kuvwanda na lukwikilu na kisambu ya beno mosi. Mu zola ti beno vwanda na lukwikilu na yina mu ke tuba. Mu ke lomba Yandi na kubelusa beno. Mu ke lomba Yandi na kulemvokila konso disumu. Yinki kele disumu yina? Kukondwa lukwikilu.

<sup>225</sup> Kana beno, bayankaka ya beno awa me bakaka ntete ve mbotika na Nkumbu ya Yesu Klisto; baptistère kele ya kukubama. Mpe kana ve, kima mosi kaka me kanga beno na manima kele kukondwa lukwikilu. Samu na yinki beno ndima yawu diaka? Beno manga kima yango. Beno lenda mona ve Mpeve ya Nzambi? Beno lenda mona ve bisalu ya Nzambi?

<sup>226</sup> Beno kwenda ntama ya ba-organisation yina. Kota na Mfumu Yesu, na manima kuvutuka na organisation ya beno, mpe kumwangisa kaka Nsemu. Beno vwanda ve na boma, beno ke vwanda kuna ntama mingi ve. Ba ke sala beno. . . Yinki ya ke



sala? Ya ke lomba dibuundu ya beno mosi kukuma na kisika ya kubaka lukanu.

<sup>227</sup> Ntangu mu katukaka na dibuundu ya ba-Baptiste mpe telamaka awa, mabuundu zolaka baka lukanu, na yina ba basisaka munu. Ya kele kieleka. Mu ke vingila ba losa munu na ngaanda, mpe kulandila, mpe kulandila. Kasi kilumbu mosi, ba ke yamba munu, ntangu mu ke sabuka Jourdain. Kieleka. Ba ke losa beno, kasi ntangu beno ke sabuka Jourdain, “Ya kele na dibanza mosi yina ke tandula munu mpe ke kumisa ntima ya munu kyese, Mu ke sabuka kaka ve nzadi yina.” Ya kele kima mosi. Kilumbu mosi mu ke kwisa na nzadi, mu ke . . . Yandi ke vwanda Muntu mosi kuna ke vingila . . . pesa munu mbote. Mu ke vwanda kaka ya kieleka.

<sup>228</sup> Awa Yandi zonzaka na nzila ya Ndinga ya Yandi, Yandi ke zonzaka na nzila ya nyonso, bima nionso ke tambula kaka na mutindu ya kulunga na nzila ya Ndinga. Muntu mosi ve lenda tuba kima mosi samu na kutelemina yawu. Ya kele na ntwala ya bantu. Ntama mingi ve ndinga yayi ke vwanda bantu ya kukangama, . . . Beno kuwa munu. Beno kuwa munu. Ntama mingi ve, awa. Ya ke tubama ve, na yina beno ke kukiyufula. Kasi na ntangu beno lenda kuwa, kutumama.

<sup>229</sup> O Nzambi, Yina vangaka mazulu mpe ntoto, bantu yayi ke sambila samu na mosi na yankaka. Ntangu Nge vumbukaka na suka ya Paki, Nge siamisaka ti Nge vwandaka Mesiya. Nge siamisaka ti Nge vwandaka Mesiya na ntwala ya Nge vumbukaka. Nge me siamisa ti Nge vwandaka, na nzila ya kidimbu ya Mesiya, Kidimbu ya Nzambi yina vwandaka na kati ya Nge. Beno vwandaka Ya kutula kidimbu na Nzambi samu na kusala kima yankaka ve kasi yina Yandi tubaka. Nge tubaka, “Mu ke salaka ntangu nionso yina ke sepelisaka Tata.” Yina ke keba Ndinga ya Yandi. Samu na kusepelisa Nzambi, beto fwana kwikila Ndinga ya Yandi mpe kuzitisa Ndinga ya Yandi. Mpe na yina, Tata, mutindu mosi ya kele bubu yayi, ti konso mwana ya bakala to . . . ya Nzambi, konso mwana ya kento ya Nzambi, samu na kusepelisa Nzambi, fwana zitisa Ndinga ya Nzambi. Mpe, Nzambi, beto ke na kuzitisaka Ndinga ya Nge ntangu yayi na kutentikaka maboko na zulu ya mosi na yankaka. Mpe mu ke sambila samu na bantu yayi.

<sup>230</sup> Na manima beto me kuwa Ndinga me longama, mpe beto me mona banzenza me telemisa maboko ya bawu, kumona Mpeve-Santu ya nene ke basika kuna mpe ke tuba na bawu mabanza ya kieleka na ntima ya bawu, mpe nani bawu kele, kisika ba me katuka, yinki ke salama, mpe nionso yina, wapi mutindu bantu lendaka tula ntembe diaka? Nzambi, yina kele musendo ya nene samu na bayayi me telama na suka yayi na ziunga ya bibaka ya nene ya dibuundu yayi awa.

<sup>231</sup> Mpe binama ya nzutu ya beno ke na kusalaka mpasi, mpe

bamama ya bantwenya na ba-bébé ya bawu, mpe batata, mpe bantu ya kukula, mpe nionso, ke vingila, ke tala mbote, ke tala kaka na kumona kidimbu mosi ya Nzambi ya moyo. Na yina beno me mona Yandi kukota na kosalu, mpe kusiamisa ti Yandi kele Yehowa, ti Yandi kele Yesu, Yina vumbukaka na lufwa. “Mu ke zinga mvula na mvula, mpe mu ke na bafungula ya lufwa mpe ya difelo,” samu Yandi bukaka kidimbu na yawu. Yandi bukaka kidimbu ya lufwa. Yandi bukaka kidimbu ya ntoni. Yandi bukaka kidimbu ya difelo. Yandi bukaka kidimbu ya ntoni. Mpe Yandi zibulaka kidimbu na Yinti ya Luzingu, mpe botikaka beto na nzila ya Mpeve-Santu ya Yandi na kati ya Yinti yina ya Luzingu, mpe salaka beto bana ya babakala mpe bana ya bakento ya Nzambi, mpe pesaka beto lutumu ya kutentika maboko na zulu ya mosi na yankaka: “Mpe bidimbu yayi ke landa bayina ke kwikila; kana bawu tentika maboko na zulu ya bambevo, bawu ke beluka.” Tata Nzambi, ya fwana vwanda.


<sup>232</sup> Mu ke tuba na ngolo ya Nsangu ya mbote, na nzila ya Nzambi ya Mazulu Yina tumaka munu mpe fidisaka munu samu na kulonga Nsangu ya mbote, na nzila ya Nzambi Yina sonikaka Ndinga, na nzila ya Wanzio Yina kele awa samu na kusiamisa Ndinga, Mu ke tuba yayi samu na lukwikilu yina mu ke na yawu na kati ya bantu, ti diabulu fwana bika konso mbevo awa, bantu nionso ya mpasi, mpe ngolo ya Nzambi ke vumbula bawu na mavimpi ya mbote mpe ngolo diaka, mutindu lubambuku ya lukutakanu yayi ya Paki. Basika, Satana. Ba me nunga nge. Yesu nungaka nge bamvula funda mosi na bankama yivwa me luta, mpe ba me nunga nge. Beno basika na bantu, na Nkumbu ya Yesu Klisto.

Mbote mingi, Docteur Neville. Amen.

<sup>233</sup> Mbote mingi, Mpangi Neville. Bantu yikwa na kati ya beno ke kwikila? Beno telemisa maboko ya beno. Bantu yikwa ke tuba, beno tuba na yayi: “Ntangu yayi mu me ndima ti Yesu Klisto, mutindu Mwana ya Nzambi yina me vumbuka na lufwa, Yandi kele Mvulusi ya munu, Yandi kele Ntinu ya munu, Yandi kele Munganga ya munu. Mu me beluka ntangu yayi. Mu me vuluka. Mu ke zinga samu na Yandi Yina kufwaka samu na munu. Mu ke vumbuka awa na kati ya luzingu ya malu-malu, samu na kukwenda na ntwala samu na kusala nionso samu na Yina. . . samu na Yandi Yina vumbukaka samu na munu. Alleluia!” Lukumu na Nzambi ya moyo.

<sup>234</sup> Ntangu yayi, nge ke kwikila na ntima ya nge ya muvimba? Nyonso yina ke ndima yawu na zulu ya lufulu ya Kukatula-masumu. . . Ntangu yayi beno bambuka moyo, kilumbu mosi Satana kangaka beno, kasi Yesu basisaka kima yina mutindu kukatula mpusu na dikutu ya disangu. Yandi bumbaka yawu; mpe yina Yandi salaka, Yandi talisaka Satana. Mpe ntangu Yandi vumbukaka na suka ya Paki (Alleluia!) Yandi nungaka diabulu, na zulu ya kimbevo, na zulu ya lufwa, na zulu ya ngolo nionso

ya mbeni, mpe mbeni kele diaka ve na ngolo. Yandi kele kaka luvunu. Kana yandi lenda vuna beno, mbote mingi. Kasi kana yandi lenda vuna beno ve, na yina beno ke ndima ve luvunu ya yandi.

<sup>235</sup> Kaka ntangu yayi beno lenda kuzwa Mpeve-Santu. Kaka ntangu yayi beno lenda vwanda ya kifuluka na Mpeve ya Yandi. Kaka na ntangu yayi beno lenda beluka, kana beno lenda ve kubaka luvunu ya yandi. “Muntu nyonso yina ke zola, ti yandi kwiza ti yandi kunwa na Bamaza ya Yinto ya Luzingu ya mpamba.” Kana beno ke kwikila yawu, beno telama, beno nionso. Beno telemisa maboko ya beno mpe beno kuzwa Mpeve-Santu mpe ngolo ya kubeluka ya Yandi, na Nkumbu ya Yesu. 

61-0402 Kidimbu Ya kieleka Ya Paki  
Branham Tabernacle  
Jeffersonville, Indiana U.S.A.

KIKONGO-KITUBA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)